

VOORWAARTS

E.G WHITE

“In die opbou van Sy werk, maak die Here nie altyd alles vir Sy diensknegte duidelik nie. Somtyds stel Hy die vertrouwe van Sy volk op die proef deur hulle in die geloof te laat voor-uit beweeg. Somtyds bring Hy hulle in engtes en plekke van beproewing, en beveel hulle om voorwaarts te gaan wanneer dit lyk of hul voete aan die waters van die Rooi See raak. Dit is op sulke tye, wanneer die gebede van Sy diensknegte in ernstige geloof, na Hom opstyg, dat Hy die weg voor hulle baan, en Hy lei hulle uit in die ruimte.

Die Here wil hê dat Sy volk in hierdie dae moet glo dat Hy net sulke groot dinge vir hulle sal verrig as wat Hy vir die kinders van Israel gedoen het op hulle reis van Egipte na Kanaan. Ons moet 'n opgevoede geloof hê wat nie sal aarsel om in die allermoeilikste ervarings Sy opdragte uit te voer nie. “Voorwaarts” is die bevel van God aan Sy volk. “

- *Raad oor -Rentmeesterskap*, bl. 277.

Voorwaarts

Hierdie uitgawe se kopiereg word gehou © 2012 deur Stanborough Press Ltd, Alma Park, Gratham, Lincolnshire, verenigde Koninkryk

Alle regte word voorbehou

Britse biblioteek katalogisering in publikasiedata. 'n katalogiese rekord vir hierdie boek is beskikbaar van die Britse biblioteek.

ISBN-978-1-907456-51-0

vir meer inligting kontak:

Posbus 75700

Garden view

2047

tel: (011)616-6800

web: www.tcadventist.org.za

Inhoud

Hoofstuk:

1. Voorwaarts	1
2. Brood en Water Gewis	9
3. Die Bangoed	13
4. Die Tiende	23
5. Offergawes	29
6. 'n Weduwee Gevoed	37
7. Om te Gee Is om te Leef	39
8. Die Fees in Simon se Huis	43
9. 'n Veranderde Kerk	55

Hierdie boekie is 'n versameling van uittreksels uit die volgende boeke

deur Ellen G. White:

Patriarge en Profete

Prophets and Kings

Die Koning van die Eeue

Raad oor Rentmeesterskap

Voorwaarts

God het nog nooit nagelaat om voorsiening te maak vir Sy volk en vir die werk wat Hy aan hulle opgedra het nie. Om die bewoners van die aarde te win en te waarsku, is die werk van die hemel, maar God het verkies om die verlore mense te gebruik om hulle medemense te bereik. Deur die eeue van die aarde heen het krisisse dikwels voorgekom, en die verhale van die mensdom se welslae en mislukkings, van die lankmoedigheid en wonderbare intrede van God, sal dien om ons geloof dieper en sterker te maak.

Daar is in ons tyd “onmoontlikhede,” Skelfseë, Jerigo’s, hongersnode, armoede en menigtes wat gevoed moet word. Maar daar is ook ’n God wat gereed staan om vir ons net sulke groot dinge te doen soos die wat opgeteken staan in hierdie verhale in die Gees van profesie. Hoe dikwels weier ons om die bevele van God na te kom en vervang ons dit met ons eie planne.

Daar was nog altyd net een vereiste vir sukses in die mens se ondememings vir God, naamlik ’n toegewyde, verbonde volk wat hulle aan die wil en die plan van God onderwerp. Kom, laat ons daardie soort mense wees, gereed om orals, te eniger tyd wanneer die Here dit beveel, “VOORWAARTS” te gaan.

Voorwaarts

Met hulle heupe omgord, met skoene aan hulle voete en hulle staf in die hand het Israel swygend en met ontsag en verwagting gewag op die koning se bevel dat hulle moes trek. Voor dagbreek was hulle in die pad. Gedurende die plaë, terwyl die openbaringe van Gods mag in die slawe se harte geloof verwek en hulle verdrukke met vrees besiel het, het die Israëliete geleidelik in die land Gosen saamgekom; en ondanks hulle plotselinge vertrek is sekere reëlins reeds getref vir die nodige organisasie en beheersing van die bewegende skare. Hulle was reeds in groepe verdeel, elk met sy aangewese leier.

“Omtrent seshonderdduisend te voet, die manne buiten die kinders. En ’n menigte mense van gemengde bloed het ook saam met hulle opgetrek. “Onder die skare was nie net diegene wat weens hulle geloof in die God van Israel gegaan het nie, maar ook ’n veel groter aantal wat net van die plaë wou weggom, of wat uit blote nuuskierigheid of opge-wondenheid agter die trekkende Israëliete aangegaan het. Daardie klas was altyd vir Israel ’n struikelblok en ’n strik.

Die volk het ook “kleinvee en beeste ’n groot hoeveelheid vee” met hulle saamgeneem. Dit was die eiendom van die Israëliete wat nooit, soos die Egiptenare, hulle besittings aan die koning verkoop het nie. Jakob en sy seuns het hulle beeste en hulle kleinvee saam met hulle na Egipte geneem, en daar het hulle grootliks vermeerder. Voordat hulle uit Egipte weggetrek het, het die volk, op bevel van Moses, hulle onbetaalde loon geëis; en die Egiptenare was maar te gretig om van hulle ontslae te raak, en het nie geweier nie. Die slawe is daar weg, belaa met die buit van hulle verdrukke.

Op daardie dag is die geskiedenis wat honderde jare vantevore in profetiese gesig aan Abraham geopenbaar was, afgesluit. “Weet vir seker dat jou nageslag vreemdelinge sal wees in ’n land wat aan hulle nie behoort nie; daar sal hulle diensbaar wees en verdruk word vierhonderd jaar lank. Maar Ek sal ook die nasie oordeel aan wie hulle diensbaar moet wees, en Daarna sal hulle uittrek met baie goed.” Genesis 15: 13, 14. Die vierhonderd jaar was nou verstreke en op daardie selfde dag het die Here die kinders van Israel, volgens hulle leërafdelings, uit Egipteland uitgelei. ’n Kosbare erfnis wat die Israëliete met hulle saam uit Egipte weggeneem het, was die

gebeente van Josef wat so lank op die vervulling van die belofte van God gewag het en wat Israel gedurende daardie donkere jare van slawemy herinner het aan hulle komende verlossing.

Pleks dat Hy hulle reguit deur die land van die Filistyne na Kanaan neem het, het die Here hulle suidwaarts na die oewers van die Skelfsee gelei. "Want God het gesê: "Die volk kan dalk berou kry as hulle oorlog sien, en teruggaan na Egipte." As hulle geprobeer het om deur die land van die Filistyne te trek, sou hulle teenstand ondervind het, want die Filistyne sou hulle vir slawe aangesien het wat van hulle meesters wegvlug, en hulle sou nie geaarsel het om teen hulle oorlog te maak nie. Die Israeliete het in elk geval nie oor die nodige wapens beskik om so 'n magtige, oorlogsugtige volk aan te durf nie. Hulle het min kennis van God gehad en hulle geloof in Hom was nog maar swak, en hulle sou verskrik en moedeloos geword het. Hulle was nie net ongewapend en sonder enige kennis van oorlogvoering nie, maar hulle lange jare van slawemy het hulle ook geesloos gemaak, en boonop het hulle vroue en kinders en vee by hulle gehad. Deur hulle na die Skelfsee te lei het die Here bewys dat Hy sowel 'n God van genade as van wysheid is.

"So het hulle dan van Sukkot af weggetrek en laer opgeslaan in Etam, aan die kant van die woestyn. En die Here het voor hulle uit getrek, bedags in 'n wolkkolom om hulle op die pad te lei, en snags in 'n vuurkolom om hulle voor te lig, sodat hulle dag en nag kon trek. Die wolkkolom het nie bedags en die vuurkolom nie snags voor die volk gewyk nie." Die psalm-digter sê: "Hy het 'n volk uitgebrei as bedekking en vuur om die nag te verlig." Psalm 105:39. Kyk ook 1 Korinthiërs 10:1, 2. Hulle onsigbare Leidsman se vaandel was altyd by hulle. Bedags het die volk hulle op hulle reis gelei, of dit het as bedekking bokant die skare gedien. Dit het as beskerming teen die brandende hitte gedien, en deur sy koelte en vog in die dorre woestyn welkome verkwikking aangebied. Snags het dit 'n vuurkolom geword wat hulle kamp verlig en hulle voortdurend aan die Goddelike teenwoordigheid herinner het.

In een van die mooiste en vertroostendste gedeeltes van Jesaja word daar na die volk - en vuurkolom verwys as 'n sinnebeeld van die sorg van God vir Sy volk in die laaste groot stryd met die magte van boosheid. "Dan skep die Here oor elke woonplek van die berg Sion en oor sy plekke van same-koms 'n volk bedags en rook met die glans van vuurvlamme in die nag; want oor alles wat heerlik is, sal daar 'n beskutting wees. En daar sal

'n afdak wees vir 'n skaduwee bedags teen die hitte en vir 'n skuilplek en toevlug teen die stortbui en die reën." Jesaja 4: 5,6.

Hulle het deur 'n somber woestynstreek gereis. Reeds het hulle begin wonder waarheen hierdie weg hulle sou voer; en hulle het moeg geword vir die moeilike pad, en in sommige harte het vrees vir agtervolging deur die Egiptenare reeds ontstaan. Maar die volk het voortbeweeg en hulle het gevolg. En nou het die Here Moses beveel om in 'n nou kloof af te draai en langs die see laer op te slaan. Daar is aan hom geopenbaar dat Farao hulle sou agtervolg, maar dat God hulle met redding sou vereer.

In Egipte het dit rugbaar geword dat die Israeliete nie in die woestyn vertoef het om te aanbid nie, maar dat hulle in die rigting van die Skelfsee getrek het. Farao se raadgewers het aan die koning gesê dat hulle slawe gevlug het en nooit sou terugkeer nie. Die volk het die feit betreur dat hulle so dwaas was om die dood van hulle eersgeborenes aan die mag van God toe te skryf. Nadat die wyse manne van hulle skrik herstel het, het hulle die plaas aan natuurlike oorsake toe-geskryf. Hulle het gesê: "Wat het ons nou gedoen dat ons Israel laat trek het, sodat hulle ons nie meer dien nie?"

Farao het sy strydmagte versamel, seshonderd uitgesoekte strydwaens ... en al die ander strydwaens van Egipte, ruiters en aanvoerders en voetvolk. Die koning self, vergesel van die groot manne van sy ryk, was aan die voorpunt van hierdie aanvalsleër. Om die goedkeuring van die gode te verkry en die welslae van die ondememing te verseker, het die priesters ook met hulle saamgegaan. Die koning was van voorneme om die Israeliete bang te maak met sy grootse magsvertoon. Die Egiptenare was bang dat hulle gedwonge onderwerping aan die God van Israel hulle in die oë van die ander nasies belaglik sou maak; maar as hulle nou met groot magsvertoon uitgaan en die vlugteling terugbring, sou hulle hulle eer herstel en ook die dienste van hulle slawe herwin.

Die Hebreërs se laer was langs die see en sy waters was skynbaar 'n onoorkomelike versperring voor hulle. Boonop het die berge aan die suide verdere vordering in daardie rigting belet. Skielik sien hulle in die verte die blink pantsers en die bewegende strydwaens wat die koms van die oprukende leër verrai. Namate die mag nader kom, besef hulle dat hulle deur die hele Egiptiese leër agtervolg word. Israel is vreesbevange. Sommige bid tot die Here, maar die meerderheid haas hulle om by Moses te gaan kla: "Het u, omdat daar in Egipte glad geen grafte is nie, ons saamgeneem

om in die woestyn te sterwe? Wat het u ons nou aangedoen, dat u ons uit Egipte uitgelei het? Is dit nie die woord wat ons u in Egipte gesê het nie: Laat ons met rus dat ons die Egiptenaars kan dien? Want dit is beter vir ons om die Egiptenaars te dien as om in die woestyn te sterwe.”

Moses was diep verontrus omdat sy volk so min vertrou in God aan die dag gelê het, ondanks hulle herhaaldelik die openbaring van Sy mag tot hulle voordeel aanskou het. Hoe kon hulle die skuld vir hulle moeilikhede en gevare op hom pak aangesien hy die duidelike bevel van God gehoorsaam het? Daar was wel geen moontlikheid om te ontvlug tensy God self sou intree nie, maar aangesien hy weens sy gehoorsaamheid aan God in hierdie moeilikheid beland het, het Moses die gevolge nie gevrees nie. Bedaard het hy die volk verseker: “Wees nie bevrees nie, staan vas en aanskou die verlossing van die Here wat Hy vandag vir julle sal bewerk; want soos julle die Egiptenaars vandag sien, sal julle hulle nie weer sien in ewigheid nie. Die Here sal vir julle stry, en julle moet stil wees.”

Dit was geen maklike saak om die leërskare van die Israeliete op die toetrede van die Here te laat wag nie. Omdat hulle geen selfbeheersing of dissipline gehad het nie, het hulle gewelddadig en onredelik geword. Hulle het verwag om spoedig weer in die hande van hulle verdrukke te wees en hulle het lank en luid geweeklaag. Hulle het die wonderbaarlike wolkkolom gevolg as ’n teken van God dat hulle moet voorwaarts trek; maar nou het hulle hulle afgevra of dit nie dalk die voortekene van ’n groot ramp was nie. Het dit hulle dan nie aan die verkeerde kant van die berg op ’n onbegaanbare weg gelei nie? Daarom het hulle die engel van die Here in hulle misleiende denke vir ’n onheilsgesig aangesien.

Maar toe die Egiptiese leër op hulle toesak en verwag om hulle maklik te oorrumpel, lig die wolkkolom hom sierlik op in die hemele. Hy beweeg bo-oor die Israeliete en daal tussen hulle en die Egiptiese leër neer. Nou is daar ’n donker muur tussen agtervolgers en agtervolgdes. Die Egiptenare kon die laer van die Hebreërs nie meer sien nie en moes stilhou. Maar namate die nag donkerder word, word die wolkmuur vir die Hebreërs ’n groot lig wat hulle hele laer met die lig van die dag verhelder.

Toe het daar weer in die harte van die Israeliete hoop gekom. Moses het die Here aangeroep: “Toe vra die Here vir Moses: “Wat roep jy na My? Sê aan die kinders van Israel dat hulle moet wegtrek. En jy, hef jou staf op en steek jou hand uit oor die see en kloof dit, sodat die kinders van Israel dwarsdeur die see op droë grond kan trek.”

Die psalmdigter beskryf in sy lied hoe Israel deur die see gegaan het: “U weg was in die see en u paaie in groot waters, en u spore was nie te beken nie. U het u volk soos skape gelei deur die hand van Moses en kiron.” Psalm 77: 20, 21. Toe Moses sy staf uitstrek, gaan die waters oop en Israel loop op droë grond die see in terwyl die water aan weerskante soos ’n groot muur staan. Die lig van God se vuurpilaar skyn op die skuimende golwe en verlig die pad wat soos ’n voor deur die waters van die see oopgeklou is en in die duisternis op die ander oewer verdwyn.

Toe het die Egiptenaars hulle gejaag en agter hulle aan getrek - al Farao se perde, sy strydwaens en sy ruiters - die see in. En in die morewaak het die Here, in die vuur- en wolkkolom, op die leër van die Egiptenaars afgekyk en die leër van die Egiptenaars in verwarring gebring. Die geheimsinnige wolk het voor hulle oë in ’n vuurkolom verander. Die donder het gedreun en die weerlig het geblits. “Die wolke het water uitgegiet, die hemele het donder laat hoor, ook het u pyle rondgevlug. U rollende donder het weerklink; bliksems het die wêreld verlig; die aarde het gesidder en gebewe.” Psalm 77: 18, 19.

Die Egiptenare was verwar en verskrik. Te midde van die toom van die elemente waarin hulle die stem van ’n vertoomde God kon hoor, het hulle probeer omdraai om terug te vlug na die oewer waarvandaan hulle gekom het. Maar Moses het sy staf uitgestrek, en skuimend en bulderend het die opgehoopte water, gretig vir sy prooi, teruggestroom en die Egiptenare in hulle donkere dieptes verswelg.

Toe dit more word, sien die Israeliete al wat van hulle magtige vyande oorgebly het - die gepantserde lyke wat op die strand uitgespoel het. Hulle is in een nag uit die aakligste gevaar gered. Die groot hulpelose skare slawe wat geen krygskuns geken het nie, vroue, kinders en vee met die see voor hulle en die magtige Egiptiese leër op hulle hakkehet gesien hoe hulle weg deur die water geopen is en hoe hulle vyande in die oomblik van verwagte oorwinning vernietig is. Net Jehova alleen het hulle verlos, en tot Hom het hulle harte met dankbaarheid en geloof uitgegaan. Hulle gevoelens is in lofliedere uitgespreek. Die Gees van God het op Moses gerus en Hy het die volk voorgedaan in ’n segelied van danksegging, die oudste en een van die verhewendstes wat aan mense bekend is.

“Ek wil sing tot eet van die Here, want Hy is hoog verhewe.
Die perd en sy ruiter het Hy in die see gewerp.
Die Here is my krag en my psalm,

en Hy het my tot heil geword.
 Hy is my God, Hom sal ek roem;
 die God van my vader, Hom sal ek verhef.
 Die Here is 'n krygsman;
 Here is sy naam.
 Hy het Farao se strydwaens en sy leërmagte in die see gewerp.
 En sy beste vegsmanne het in die Skelfsee gesink.
 Die watervloede het hulle oordek.
 Hulle het in die kolke gesink soos 'n klip.
 o Here, U regterhand is verheerlik deur krag.
 U regterhand, o Here, verpletter die vyand...
 o Here, wie is oor U onder die gode?
 Wie is soos U, verheerlik in heiligheid,
 gedug in roemryke daade, een wat wonders doen?...
 U het deur U guns die volk gelei wat U verlos het;
 U het hulle deur U krag na U heilige woning gevoer ...
 Die volke het dit gehoor, hulle het gesidder...
 Verskrikking en vrees het op hulle geval;
 deur die grootheid van U arm was hulle stom soos 'n klip,
 terwyl U volk deurtrek, Here,
 terwyl die volk deurtrek wat U verwerp het.
 U bring hulle in en plant hulle op die bergland van u erfnis,
 die plek, o Here, wat U as vaste woonplek vir U berei het."

Exodus 15:1-17

Soos die stem van die see het die verhewe hulde van die groot skare van Israel opgegaan. Die vroue van Israel onder leiding van Mirjam, Moses se suster, het dit verder gevoer terwyl hulle met tamboeryne in die hande gedans het. Tot ver oor die woestynsand en die see het die woorde van hulle loflied weerklink - "Sing tot eer van die Here, want Hy is hoog verhewe."

Hierdie lied en die verlossing wat daardeur herdenk word, het op die geheue van die Hebreërs 'n indruk gemaak wat nooit uitgewis kon word nie. Eeu na eeu het die profete en sangers van Israel dit oorvertel en getuig dat Jehova die krag en die verlossing is van diegene wat op Hom vertrou. Daardie lied behoort nie uitsluitlik aan die Joodse volk nie. Dit wys ook op die toekomstige verdelging van al die vyande van geregtigheid en die laaste sege van die Israel van God. Die profeet van Patmos het die witgeklede skare wat "oorwinnaars" is, op die "see van glas, gemeng met vuur" sien staan "met siters van God. En hulle het die lied gesing van Moses, die diensknecht van God, en die lied van die Lam" (Openbaring 15:2,3).

"Nie aan ons, o Here, nie aan ons nie, maar aan U Naam gee eer, om U

goedertierenheid, om U trou ontwil." Psalm 115:1. Van hierdie gees was die verlossingslied van Israel deurtrokke en dit is die gees wat tuis hoort in die harte van almal wat God vrees en Hom liefhet. Deur ons van diensbaarheid aan die sonde te bevry, het God vir ons 'n groter verlossing te weeggebring as die van die Hebreërs by die Skelfsee. Soos die Hebreërs behoort ons die Here met hart en siel en stem te prys vir Sy "wonderdade aan die mensekinders." Diegene wat by die groot genadedade van God stilstaan en ook Sy kleinere gawes nie uit die oog verloor nie, sal hulle met vreugde omgord en in hulle harte tot die Here sing. Ons behoort gedurig ons dank te betuig vir die alledaagse seëninge wat ons uit die hand van God ontvang, en bo alles vir die dood wat Jesus gesterf het om geluk en die hemel binne ons bereik te bring. Watter medelyde, watter ongeëwenaarde liefde het God teenoor ons as verlore sondaars bewys deur ons te erken en as Sy besondere eiendom, Sy skat, aan te neem! Wat 'n opoffering het ons Verlosser gemaak sodat ons kinders van God genoem kan word! Ons behoort God te loof vir die salige hoop wat deur die groot verlossingsplan aan ons voorgehou word; ons behoort Hom te loof vir die hemelse erfnis en vir Sy dierbare beloftes; loof Hom omdat Jesus leef om vir ons in te tree.

Die Skepper sê: "Die een wat dank offer, eer My" (Psalm 50:23). Al die bewoners van die hemel loof God uit een mond. Laat ons dan nou die engelielied leer sodat ons dit saam met hulle kan sing wanneer ons, ons by hulle geledere aansluit. Laat ons soos die psalmdigter sê: "Ek wil die Here prys solank as ek lewe; ek wil psalmsing tot eer van my God solank as ek nog daar is." "Die volke sal U loof, o God, die volke almal saam sal U loof." (Psalm 146:2; 67:4).

In Sy voorsienigheid het God die Hebreërs tussen die berge en die see gebring, sodat Hy Sy krag deur hulle verlossing kon betoon en die trots van hulle verdrukke kon verpletter. Hy kon hulle op 'n ander manier gered het, maar Hy het hierdie metode verkies om hulle geloof op die proef te stel en om hulle vertrouwe in Hom te versterk. Die volk was moeg en verskrik, maar as hulle gehuiwer het toe Moses hulle beveel om voorwaarts te trek, sou God nooit vir hulle 'n pad oopgemaak het nie. Dit was "deur die geloof" dat hulle "soos oor droë grond" deur die Skelfsee getrek het (Hebreërs 11: 29). Deurdat hulle tot by die water getrek het, het hulle bewys dat hulle die woord van God soos deur Moses gespreek, geglo het. Hulle het alles in hulle vermoë gedoen en Daarna het die Magtige van

Israel die see oopgekloof om vir hulle voete 'n pad te baan.

Dit was 'n groot les vir tyd en ewigheid. Die Christen se lewe word dikwels deur gevare bedreig, en dit skyn dikwels moeilik om ons plig te doen. Die verbeelding skilder vir ons ondergang voor en slawemy of die dood agter. Nogtans spreek die stem van God duidelik: "Voorwaarts!" Ons behoort hierdie bevel te gehoorsaam al kan ons oë nie deur die duisternis dring nie en al voel ons die koue golwe onder ons voete. Die struikelblokke wat ons vordering belemmer, sal nooit voor 'n aarselende, twyfelende gees wyk nie. Diegene wat gehoorsaamheid uitstel totdat elke sweem van onsekerheid verdwyn het en daar geen gevaar van mislukking of neerlaag is nie, sal nooit gehoorsaam nie. Ongeloof fluister: "Kom ons wag totdat alle struikelblokke verwyder is en ons die pad duidelik kan sien;" maar geloof gaan moedig voorwaarts en dit hoop alles en glo alles.

Die wolk wat vir die Egiptenare duisternis was, was vir die Hebreërs 'n groot lig wat die hele laer verlig en die pad voor hulle verhelder het. Op dieselfde manier bring die voorsienighede van God vir die ongelowiges duisternis en wanhoop terwyl hulle vir die vertrouende siel vol lig en vrede is. Die pad waarop God voorgaan, kan deur die woestyn of deur die see loop, maar dis 'n veilige pad.

Brood en Water Gewis

VAN die Rooi See af het die Israeliete hulle reis onder leiding van die wolkkolom voortgesit. Die natuurtoneel rondom hulle was uiters somberkaal, verlate berge, onvrugbare vlaktes, en die see met sy strand bestrooi met die lyke van hulle vyande, het tot in die verte weggestrek. Nogtans het hulle, hulle in die bewustheid van hulle vryheid verheug, en elke sweem van ontevredenheid is onderdruk.

Maar drie dae lank het hulle voortgereis sonder om water te vind. Die voorraad wat hulle saamgeneem het, was op. Daar was niks om hulle brandende dors te les terwyl hulle hulle moeë voete oor die verskroeiende vlaktes voortsleep nie. Moses, wat daardie streek geken het, was al een wat geweet het dat die water by Mara, die naaste fontein, onbruikbaar was. Met groot kommer het hy die leidende wolk dopgehou. Sy moed het hom begeef toe hy die blye uitroep: "Water! Water!" van die kolonne hoor opgaan. Manne, vroue en kinders het hulle na die fontein gehaas, maar 'n kreet van teleurstelling het van die skare opgegaan - die water was bitter.

Deur skok en wanhoop gedryf, het hulle Moses verwyt omdat hy hulle daarlangs gelei het, sonder om daaraan te dink dat die Goddelike teenwoordigheid in daardie geheimsinnige wolk sowel Moses as hulle gelei het. In sy droefheid oor hulle ontsteltenis het Moses gedoen wat hulle vergeet het om te doen: hy het die Here ernstig om hulp gebid. "En die Here het aan hom 'n stuk hout gewys; dit het hy in die water gegooi, en die water het soet geword." Daar het die Here Israel deur Moses beloof: "As jy getrou na die stem van die Here jou God luister en doen wat reg is in Sy oë, en luister na Sy gebooe en al Sy insettinge hou, dan sal Ek geeneen van die siektes op jou lê wat Ek op Egipteland gelê het nie; want Ek is die Here wat jou gesond maak."

Van Mara af het die volk na Elim gereis, en daar het hulle "twaalf waterfontein en sewentig palmbome" gevind. Daar het hulle etlike dae lank vertoef voordat hulle na die woestyn Sin getrek het. 'n Maand nadat hulle uit Egipte vertrek het, het hulle hulle eerste laer in die woestyn opgeslaan. Hulle voedselvoorrade was nou byna uitgeput. Die weiding was in die woestyn maar skaars, en hulle kuddes het begin maer word. Hoe sou daar vir hierdie groot skare voedsel voorsien word? Hulle het begin twyfel en weer begin kla. Selfs die owerstes en die oudstes van die volk het saam

met die ander teen die deur God aangestelde leiers begin kla: “Het ons maar in Egipteland deur die hand van die Here gesterwe toe ons by die vleispotte gesit en volop brood geëet het! Want julle het ons in hierdie woestyn uitgelei om hierdie hele vergadering van honger te laat sterwe.”

Tot nog toe het hulle nie honger gely nie; hulle het nog genoeg gehad, maar hulle het vir die toekoms gevrees. Hulle kon nie verstaan hoe daardie groot skare op hulle reise deur die woestyn kos sou kry nie, en in hulle verbeelding het hulle die kinders van die honger sien omkom. Die Here het toegelaat dat hulle moeilikhede beleef en dat hulle kosvoorraad min word sodat hulle kon leer om op Hom te vertrou wat tot nog toe hulle Verlosser was. As hulle Hom in hulle behoeftes sou aanroep, sou Hy die duidelike bewyse van Sy liefde en sorg aan hulle openbaar. Hy het beloof dat as hulle Sy gebooie gehoorsaam, hulle nie sou siek word nie, en dit was sondige ongeloof aan hulle kant om vooruit te verwag dat hulle kinders van die honger sou omkom.

God het beloof om hulle God te wees, om hulle as Sy volk te neem en om hulle na 'n groot en goeie land te lei; maar by elke hinderpaal op die weg na daardie land het hulle moedeloos geword. Hy het hulle op wonderbaarlike wyse uit hulle slawejuk in Egipte verlos om hulle op die aarde te verhef en lofwaardig te maak. Maar dit was nodig dat hulle moeilikhede moes teëkom en ontberinge moes verduur. God het hulle uit 'n verlaagde staat opgehef en geskik gemaak om onder die volke van die aarde 'n eerbare plek in te neem en om belangrike en heilige pande te ontvang. As hulle na aanleiding van alles wat Hy vir hulle gedoen het, in Hom geglo het, sou hulle gewillig gewees het om ongerief en ontberinge te verduur en selfs om waarlik te ly; maar hulle was onwillig om die Here verder te vertrou as wat hulle die voortdurende bewyse van Sy krag kon sien. Hulle het hulle bittere diensbaarheid in Egipte vergeet. Hulle het vergeet water goedheid en krag God aan hulle betoon het om hulle uit hulle slawemy te verlos. Hulle het vergeet hoe hulle kinders behoue gebly het toe die doodsengel al die eersgeborenes in Egipte omgebring het. Hulle het vergeet hoe God Sy mag by die Rooi See getoon het. Hulle het vergeet dat hulle veilig op die weg wat vir hulle gebaan was deur die see gegaan het, maar dat hulle vyande wat hulle probeer volg het, deur die water van die see oorweldig was. Hulle het net hulle teenswoordige ongeriewe en beproewings gewaar en gevoel; en pleks dat hulle gesê het: “God het vir ons as slawevolk groot dinge verrig,” het hulle van die moeilikhede van die

weg gepraat en gewonder wanneer hulle vermoeiende pelgrimstog tog sou eindig.

Die geskiedenis van die lewe van Israel in die woestyn is ter wille van die Israel van God tot aan die einde van die tyd opgeteken. Die verhaal van Gods handeling met die woestynswerwers in al hulle heen en weer togte, in hulle blootstelling aan honger en dors en moegheid en in die trefende openbaringe van Sy krag vir hulle verlossing, bevat waarskuwings en lering vir Sy volk in alle eeue. Die afwisselende ondervindinge van die Hebreërs was 'n oefenskool om hulle voor te berei om hulle beloofde woning in Kanaan in besit te neem. In hierdie tyd wil God hê dat Sy volk die beproewing wat die outydse Israel getref het, met 'n nederige hart en 'n ontvanklike gees moet betrag, sodat hulle vir die hemelse Kanaan gereed gemaak kan word.

Daar is baie wat op die Israeliete terugkyk en verbaas staan oor hulle ongeloof en klagtes en voel dat hulle nie self so ondankbaar sou gewees het nie; maar wanneer hulle geloof deur selfs geringe beproewing op die proef gestel word, lê hulle niks meer geloof of geduld aan die dag as outydse Israel nie. Wanneer hulle in noutes kom, kla hulle oor die maniere wat God gekies het om hulle te reinig. Hoewel daar in hulle huidige behoeftes voorsien is, is hulle onwillig om God vir die toekoms te vertrou, en hulle is gedurig bekommerd dat hulle dalk sal arm word en dat hulle kinders sal ly. Sommige verwag altyd onheil of hulle vergroot die reeds bestaande moeilikhede in so 'n mate dat hulle oë verblind raak vir die baie ryke seëninge waaroor hulle dankbaar behoort te wees. Pleks dat die hindemisse wat hulle teëkom hulle dwing om by God, hulle enigste kragbron, hulp te soek, skei dit hulle van Hom omdat dit by hulle rusteloosheid en ontevredenheid verwek.

Is dit reg dat ons so ongelowig is? Waarom sou ons ondankbaar en wantrouig wees? Jesus is ons Vriend; die ganse hemel stel in ons welsyn belang, en ons kommer en vrees bedroef die Heilige Gees. Ons moet nie toegee aan besorgdheid wat net knaag en vermoei maar ons nie help om die beproewing te verdra nie. Ons mag God nie in so 'n mate wantrou dat voorsiening teen toekomstige armoede die hoofdoel van ons lewe word asof ons geluk van aardse dinge afhang nie. Dit is nie die wil van God dat Sy volk onder sorg gebuk moet gaan nie. Maar die Here vertel ons nie dat daar geen gevaar op die weg is nie. Hy is nie van plan om Sy volk uit die wêreld van sonde en onheil weg te neem nie, maar Hy wys ons op die

veilige skuilplek. Hy nooi die wat bedroef en bedruk is: "Kom na My toe, almal wat vermoeid en belas is, en Ek sal julle rus gee." Gooi af die juk van bekommemis en wêreldse sorge wat julle self opgeneem het, en "neem my juk op julle en leer van My, want Ek is sagmoedig en nederig van hart, en julle sal rus vind vir julle siele." (Matthéüs 11:28, 29.) In God kan ons rus en vrede hê as ons al ons bekommemis op Hom werp, want Hy sorg vir ons. Kyk 1 Petrus 5: 7.

Die apostel Paulus sê: "Sorg daarvoor, broeders, dat daar nie miskien in een van julle 'n bose en ongelowige hart is deurdat hy van die lewende God afvallig word nie." Hebreërs 3: 12. Aangesien God soveel vir ons gedoen het, behoort ons geloof sterk, aktief en volhardend te wees. Pleks dat ons murmureer en kla, behoort die taal van ons harte te wees:

"Loof die Here, O my siel, en alles wat binne-in my is, sy heilige Naam' Loof die Here, O my siel en vergeet geeneen van sy weldade nie!" (Psalm 103:1, 2).

God het Israel se behoeftes nie veronagsaam nie. Aan hulle leier het Hy gesê: "Ek sal vir julle brood uit die hemel laat reën." En die volk het bevel gekry om elke dag 'n voorraad in te samel, en op die sesde dag twee keer soveel sodat hulle die Sabbat heilig kon vier.

Die Bangoed

DIE Hebreërs het Kanaan wel binnegetrek, maar hulle het dit nog nie onderwerp nie, en menslik gesproke sou die stryd om dit in besit te neem lank en moeilik wees. Die land is deur 'n sterk volk bewoon en hulle was gereed om enige inval op hulle gebied teen te staan. Die verskeie stamme is uit vrees vir 'n gemeenskaplike gevaar saamgebind. Hulle perde en ysterstrydwaens, hulle kennis van die land en hulle krygs-opleiding sou in hulle guns wees. Boonop is die land deur vestings versterk - "stede wat groot en tot aan die hemel versterk is" (Deuteronomium 9: 1). Alleen in die versekering dat hulle hulle op 'n krag buiten hulle eie kon beroep, kon die Israeliete hoop om in die komende stryd te seëvier.

Een van die sterkste vestings van die land - die groot en magtige Jerigo was net 'n kort afstand van hulle laer te Gilgal af. Aan die grens van 'n vrugbare vlakte wat ryk was aan 'n verskeidenheid van tropiese produkte, het hierdie trotse stad met sy paleise en tempels agter sy reusagtige verskansinge waarin weelde en ondeug gewoon het, die God van Israel uitgetart. Jerigo was een van die vemaamste setels van afgodediens, veral Astarot, die godin van die maan. Dit was die middelpunt van Kanaan se verfoeilikste en verlagendste gelowe. Die volk Israel wat nog terdeë bewus was van hulle sonde te Bet-Peor, kon hierdie heidense stad nie anders as met veragting en afsku bejeën nie.

Josua het die verowering van Jerigo as die eerste stap in die onderwerping van Kanaan beskou. Maar eers het hy die versekering gesoek dat God hom sou lei, en dit het hy dan ook gekry. Terwyl hy hom buite die kamp afgesonder het om na te dink en te bid dat die God van Israel voor Sy volk uit moes trek, het hy 'n gewapende krygsman, 'n groot, imponerende persoon "met 'n ontblote swaard in sy hand" gesien. Op Josua se vraag: "Behoort u by ons of by ons vyande?" het hy geantwoord: "Ek is die leërowerster van die Here; Ek het nou gekom." Dieselfde bevel wat Moses by Horeb ontvang het, is nou weer gegee: "Trek jou skoene van jou voete af, want die plek waar jy op staan, is heilig." Dit het die ware aard van die geheim-sinnige besoeker geopenbaar. Dit was Christus, die Hoogverhewene, wat voor die leier van Israel gestaan heil. Vreesbevange het Josua aanbiddeend op sy aangesig neergeval en die versekering gehoor: "Ek gee Jerigo met sy koning en dapper helde in jou hand." Daarna het hy bevele ontvang oor

hoe hy die stad moes inneem.

Gehoorsaam aan die Goddelike bevel het Josua die leërs van Israel gemonster. Daar moes geen aanval wees nie. Hulle moes eenvoudig met die ark rondom die stad marsjeer en basuine blaas. In die voorhoede was die gekeurde krygsmanne, maar hierdie keer nie om met hulle eie vemuf en dapperheid te oorwin nie, maar deur gehoorsaamheid aan die bevel wat God aan hulle gegee het. Sewe priesters met basuine het gevolg. Agter hulle aan het die priesters, in die gewaad van hulle heilige amp, die verbondsark, omring deur 'n heerlike heilige stralekrans, gedra. Die leer van Israel het gevolg, elke stam onder sy vaandel. Dit was die optog wat rondom die gedoemde stad gemarsjeer het. Daar was geen ander geluid as die voetstappe van daardie groot skare en die plegtige geluid van die basuine wat van die heuwels af in die strate van Jerigo weerklink het nie. Nadat hulle hulle optog voltooi het, het die leer in stilte na hulle tente teruggekeer en is die verbondsark op sy plek in die tabemakel neergesit.

Verbaas en ontsteld het die wagters van die stad elke beweging dopgehou en dit aan die owerheid vertel. Hulle het nie geweet wat al hierdie vertoon beteken nie, maar toe hulle daardie magtige vergadering elke dag een keer rondom die stad sien marsjeer met die heilige verbondsark en van priesters vergesel, het die geheimsinnigheid daarvan priesters en volk met vrees oorval. Dan het hulle, hulle sterk vestings weer ondersoek en seker gevoel dat hulle die sterkste aanslag sou kon weerstaan. Baie van hulle het gespot met die vrees dat so 'n sonderlike vertoning hulle enige kwaad kon aandoen. Ander was bevrees toe hulle die optog elke dag rondom die stad sien marsjeer. Hulle het onthou dat die Rooi See eenkeer voor hierdie volk oopgegaan het en dat daar kort gelede vir hulle 'n pad deur die Jordaanrivier oopgemaak is. Hulle wis nie watter wonderwerke God nog vir hulle kon doen nie.

Ses dae lank het die vergadering van Israel rondom die stad getrek. Die sewende dag het aangebreek en Josua het die leërs van die Here met die eerste daglig gemonster. Hierdie keer is hulle bevel om sewe keer rondom Jerigo te marsjeer, en wanneer die basuine hard blaas, hard te skreeu, want die Here het die stad aan hulle gegee.

Die groot leer het plegtig rondom die gedoemde muur gemarsjeer. Alles was stil behalwe die voetstappe en af en toe die geluid van 'n basuin wat die oggendstilte verbreek. Dit het geskyn asof die sterk mure die beleëring deur mense trotseer. Met toenemende vrees het die wagters op die muur

gekyk toe die eerste kringloop eindig en die tweede begin, gevolg deur die derde, die vierde, die vyfde en die sesde. Wat was dan die doel van hierdie geheimsinnige bewegings? Watter geweldige gebeurtenis sou volg? Dit sou nie meer lank duur nie. Met die voltooiing van die sewende rondte het die lang optog gaan staan. Die basuine wat 'n tyd lank stil was, het nou met 'n oorverdowende geluid losgebreek. Die stewige klipmuur met sy sterk torings en kantele het op sy fondament gewaggel en in puin op die grond neergestort. Die bewoners van Jerigo was lam van vrees en die leer van Israel het ingestap en van die stad besit geneem.

Die Israëliete het nie deur hulle eie mag die oorwinning behaal nie; dit het geheel en al van die Here gekom; en as eersteling van die land moes die stad met alles wat daarin was aan die Here geoffer word. Die Israëliete moes uitdruklik verstaan dat hulle in hulle verowering van Kanaan nie vir hulleself moes veg nie, maar dat hulle eenvoudig werktuie moes wees om die wil van God te volbring; hulle moes nie na rykdom of selfverheffing streef nie, maar na die heerlikheid van Jehova, hulle Koning. Voordat hulle die stad ingeneem het, het hulle die bevel gekry: "Die stad met al wat daarin is, moet 'n banoffer aan die Here wees." "Neem julle net in ag vir die ban, dat julle nie... van die bangoed neem en die laer van Israel onder die ban bring en dit in die ongeluk stort nie."

Al die bewoners van die stad, met elke lewende ding daarin "man sowel as vrou, jonk sowel as oud, tot bees, skaap en esel toe" is met die swaard gedood. Net die getroue Ragab en haar huisgesin is gered ter vervulling van die belofte van die verkenners. Die stad self is verbrand; sy paleise en tempels, sy pragtige woonhuise met al die weelderige meubels, die ryk gordyne en duur klere is alles in die vlamme gegooi. Wat nie deur die vuur vernietig kon word nie, "die silwer en die goud en die koper- en ystervoorwerpe" is aan die diens van die tabemakel gewy. Selfs die plek waar die stad gestaan het, is vervloek; Jerigo moes nooit as vesting herbou word nie; 'n vloek is uitgespreek op elkeen wat dit sou waag om daardie mure wat deur die krag van God neergewerp is, weer op te bou. 'n Plegtige verklaring is in die teenwoordigheid van die ganse Israel uitgespreek: "Vervloek is die man voor die aangesig van die Here wat sal opstaan om hierdie stad Jerigo op te bou: ten koste van sy eersgeborene sal hy sy fundamente lê, en ten koste van sy jongste sal hy sy poorte insit."

Die algehele uitwissing van die bewoners van Jerigo was slegs die vervulling van die bevel wat Moses voorheen reeds aangaande die bewoners

van Kanaan gegee het: "Dan moet jy hulle geheel en al met die banvloek tref" (Deuteronomium 7: 2). "Van die stede van hierdie volke... moet jy niks wat asem het, laat lewe nie" (Deuteronomium 20: 16). Baie mense dink dat hierdie bevel teenstrydig is met die gees van liefde wat in ander dele van die Bybel beveel word, maar hulle was werklik die voorskrifte van oneindige wysheid en goedheid. God het op die punt gestaan om Israel in Kanaan te vestig om tussen die Kanaaniëte 'n volk en 'n regering te ontwikkel wat 'n openbaring sou wees van Sy koninkryk op aarde. Hulle sou nie net die ware geloof erf nie, maar hulle moes die beginsels daarvan aan die ganse aarde verkondig. Die Kanaaniëte het hulle aan die vuilste en vemedereendste heidendom oorgegee, en dit was nodig om daardie dinge uit die land te verwyder wat gewis die vervulling van Gods genadige planne sou verhinder.

Daar is genoeg geleentheid aan die bewoners van Kanaan gegee om hulle te bekeer. Veertig jaar vantevore het die opening van die Skelfsee en die oordele wat die Egiptenare getref het, van die oppermag van die God van Israel getuig. En nou het die verowering van die konings van Midian, van Gilead en van Basan verder aangedui dat Jehova bo alle ander gode was. Sy heilige karakter en Sy afkeer van onreinheid is bewys deur die oordele wat Israel getref het toe hulle aan die afskuwelike plegtighede van Baal-Peor deelgeneem het. Van al hierdie gebeurtenisse het die inwoners van Jerigo geweet, en daar was baie wat net soos Ragab oortuig was, hoewel hulle geweier het om hulle daaraan te onderwerp, dat Jehova, die God van Israel, "God in die hemel daarbo en op die aarde hieronder" is. Soos die mense voor die sondvloed het die Kanaaniëte net geleef om die Hemel te belaster en die aarde te besoedel. En sowel liefde as regverdigheid het geëis dat die rebelle teen God en die vyande van die mense dadelik tereggestel moes word.

Hoe maklik het die leërs van die hemel die muur van Jerigo platgetrek, die trotse stad wie se vestings die harte van die ongelowige verkenner veertig jaar vantevore met vrees vervul het, in puin laat stort! Die Magtige van Israel het gesê:

"Ek gee Jerigo... in jou hand." Teen daardie woord was geen menslike krag bestand nie.

"Deur die geloof het die mure van Jerigo geval."

Hebreërs 11: 30. Die leërowerste van die Here het met niemand anders as Josua gepraat nie; Hy het Hom nie aan die vergadering geopenbaar nie,

en hulle moes Josua se woorde glo of betwyfel, die bevel wat hy in die Naam van die Here gegee het, gehoorsaam of sy gesag ontken. Hulle kon die engeleskare wat hulle onder leiding van die Seun van God bygestaan het, nie sien nie. Hulle kon geredeneer het: "Hierdie bewegings het geen betekenis nie en dis heeltemal onsinnig om rondom die stad te marsjeer en op ramshorings te blaas. Dit kan op hierdie reusagtige vesting geen uitwerking hê nie." Maar juis omdat hierdie plegtigheid so lank moes voortduur voordat die muur uiteindelik geval het, het die Israeliete die geleentheid gehad om geloof te ontwikkel. Hulle moes daarvan bewus word dat hulle krag nie in die wysheid of in die mag van mense skuil nie, maar net in die God van hulle heil. So moes hulle gewoon word om geheel en al op hulle Goddelike Leier staat te maak.

Vir diegene wat op Hom vertrou, sal God groot dinge doen. Die rede waarom Sy belydende volk so min krag het, is dat hulle te veel op hulle eie wysheid staatmaak en die Here nie die geleentheid gee om Sy krag vir hulle te openbaar nie. Hy sal Sy gelowige kinders in elke noodgeval bystaan as hulle hulle volle vertroue in Hom wil stel en Hom wil gehoorsaam.

Kort na die val van Jerigo, het Josua besluit om Ai, 'n klein dorpie tussen die klowe 'n paar kilometer wes van die Jordaanklakte, aan te val. Verkenner wat daarheen gestuur is, het berig dat dit min inwoners het en dat 'n klein leër genoeg sou wees om dit te verower.

Die groot oorwinning wat God vir hulle behaal het, het die Israeliete met selfvertroue besiel. Omdat Hy die land Kanaan aan hulle beloof het, het hulle veilig gevoel en nie besef dat dit net die hulp van God was wat aan hulle die oorwinning besorg het nie. Selfs Josua het sy planne vir die beleg van Ai beraam sonder om God daaroor te raadpleeg.

Die Israeliete het hulle eie krag begin verhef en het met veragting op hulle vyande neergesien. Hulle het 'n maklike oorwinning verwag en gemeen drieduisend man sou genoeg wees om die stad in te neem. Hulle het haastig tot die aanval oorgegaan sonder om die versekering te verkry dat God met hulle was. Hulle het byna tot by die poorte van die stad gekom toe hulle hardnekkige weerstand ondervind. Vreesbevange oor die getalle en deeglike voorbereiding van hulle vyande het hulle in wanorde teen die steilte afgevlug. Die Kanaaniëte was vlak op hulle hakke en het... hulle agtervolg van die poort af... en hulle verslaan op die afdraand." Hoewel hulle verlies, wat getalle betref, gering was -net ses-en-dertig is

gedood- het die neerlaag die hele vergadering ontmoedig. "Die volk se hart het versmelt en soos water geword." Dit was die eerste keer dat hulle werklik teen die Kanaaniete veg, en as die verdedigers van so 'n klein dorpie hulle op vlug jaag, hoe sou hulle in die groter ondernemings voor hulle vaar? Josua het in hulle neerlaag 'n bewys van die misnoeë van God gesien, en verleë en bevrees het hy "sy klere geskeur en met sy aangesig op die grond geval voor die ark van die Here, tot die aand toe, hy en die oudstes van Israel, en hulle het stof op hulle hoofde gegooi."

Josua het gebid: "Ag, Here Here, waarom het U hierdie volk ooit deur die Jordaan laat trek om ons oor te gee in die hand van die Amoriete, sodat hulle ons kan vernietig? ... Ag, Here, wat sal ek sê nadat Israel vir sy vyande die rug gegee het? En as die Kanaaniete en al die inwoners van die land dit hoor, sal hulle ons omsingel en ons naam van die aarde af uitroei; wat sal U dan vir u grote Naam doen?"

Jehova het geantwoord: "Staan op; waarom tog lê jy op jou aangesig? Israel het. ... my verbond oortree wat Ek hulle opgelê het." Dit was tyd om dadelik en beslis op te tree liewer as om te wanhoop en te ween. Daar was geheime sonde in die kamp en dit moes uitgevind en verban word voordat die teenwoordigheid en die seën van God onder Sy volk kon wees. "Ek sal nie meer met julle wees tensy julle die ban onder julle uit verdolg nie." Een van diegene wat aangestel was om die oordele van God uit te voer, het Sy gebod veronagsaam, en die hele volk is verantwoordelik gehou vir die skuld van die oortreder. "Israel het... geneem van die bangoed en ook gesteel en dit selfs heimlik by hulle goed gevoeg." Josua is aangesê om uit te vind wie die misdadiger is en om hom te straf. Die lot sou gebruik word om die skuldige aan te wys. Die sondaar is nie dadelik aangewys nie, maar die saak is tydelik in twyfel gelaat sodat die volk hulle verantwoordelikheid kon voel vir die sondes onder hulle en tot selfondersoek en vernedering voor God gelei kon word.

Vroeg in die oggend het Josua die volk volgens hulle stamme laat byeenkom en die plegtige, indrukwekkende seremonie het begin. Stap vir stap het die ondersoek voortgegaan. Nader en nog nader het die vreeslike toets gekom. Eers die stam, toe die familie, Daarna die gesin en uiteindelik die man is aangewys, en Agan, die seun van Karmi van die stam van Juda is deur die vinger van God uitgesonder as die beroerder van Israel.

Om sy skuld bo alle twyfel te bepaal sodat daar geen rede kon wees om te beweer dat hy onregverdig gevonnissen is nie, het Josua Agan plegtig

besweer om die waarheid te erken. Die ongelukkige man het sy misdaad openhartiglik erken:

"Waarlik, ek het gesondig teen die Here, die God van Israel. Ek het naamlik een mooi mantel uit Sinear by die buitgoed gesien en tweehonderd sikkels silwer en een goudstaaf van vyftig sikkels in gewig, en ek het dit begeer en dit geneem; en kyk, daar lê dit begrawe in die grond binne-in my tent." Boodskappers is dadelik na sy tent gestuur. Hulle het op die aangewese plek gegrawe, en daar lê dit begrawe in sy tent, en die silwer daaronder. En hulle het dit uit die tent uitgehaal en dit na Josua... gebring en dit voor die aangesig van die Here uitgeskud."

Die vonnis is gevel en dadelik voltrek. "Hoe het jy ons in die ongeluk gestort!" het Josua gesê. "Die Here sal jou vandag in die ongeluk stort!" Aangesien die volk verantwoordelik gehou is vir Agan se sonde en as gevolg daarvan gely het, moes hulle deur hulle verteenwoordigers aan die straf deelneem. "Daarop het die hele Israel hom gestenig."

Daarna is 'n groot hoop klippe bo-op hom gestapel om te getuig van die sonde en die straf. "Daarom noem hulle daardie plek Dal Agor," dit wil sê die dal van ongeluk. In die boek Kronieke staan daar aangaande hom geskryf. "Agar, wat Israel in die ongeluk gestort het" (1 Kronieke 2: 7).

Agan het sy sonde ondanks die duidelikste en plegtigste waarskuwings en die magtigste openbaringe van die krag van God gepleeg. Die ganse Israel is gewaarsku: "Neem julle net in ag vir die ban, dat julle nie... die laer van Israel onder die ban bring... nie." Hierdie bevel is gegee onmiddellik nadat hulle deur 'n wonderwerk deur die Jordaan getrek en die volk Gods verbond deur die besnydenis erken het, na die viering van die Paasfees en die verskyning van die Verbondsengel, die Leërowerste van die Here. Daarna het die verwoesting van Jerigo gevolg as bewys van die verdolging wat alle oortreders van Gods wet sal tref. Die feit dat net die krag van God aan Israel die oorwinning besorg het, dat hulle Jerigo nie deur hulle eie krag beset het nie, het gewig verleen aan die bevel om nie van die buit te neem nie. Deur die mag van Sy eie woord het God die vesting verower; die oorwinning was Syne en die stad met alles wat daarin was, moes Syne wees.

Van al die miljoene Israeliete was daar net een man wat dit gewaag het om die bevel van God in daardie plegtige uur van oorwinning en van oordeel te oortree. Agan se hebsug is deur daardie duur kleed van Sinear geprikkel. Selfs toe dit die doodsvonnis op hom gebring het, het hy dit

“een mooi mantel uit Sinear” genoem. Een sonde het aanleiding gegee tot die ander en hy het ook die goud en die silwer wat in die Here se skatkis hoort, geneem - Hy het God die eersteling van die land Kanaan ontroof.

Die dodelike sonde wat tot Agan se ondergang gelei het, het uit gierigheid ontstaan, en van al die sondes is dit een van die wat die meeste voorkom en wat die minste as sonde beskou word. Terwyl ander oortredinge ontdek en gestraf word, gebeur dit selde dat die oortreding van die tiende gebod selfs bestraf word. Die snoodheid van hierdie sonde en die vreeslike gevolge daarvan is lesse uit Agan se geskiedenis.

Begeerlikheid is 'n kwaad wat langsaam ontwikkel. Agan het inhaligheid gekoester totdat dit 'n gewoonte geword het wat hom met byna onbreekbare bande gebind het. Terwyl hy hierdie euwel gekoester het, sou hy met afsku vervul gewees het as hy net kon dink dat dit vir Israel 'n ramp kon beteken; maar sy begripsvermoë is deur die sonde verstomp en toe die versoeking kom, het hy dit maklik ten prooi geval.

Word soortgelyke sondes nie deesdae ondanks die plegtigste waarskuwings gepleeg nie? Ons word net so duidelik belet om inhaligheid te koester as wat Agan was om nie die buit van Jerigo te neem nie. God het gesê dis afgodery. Ons word gewaarsku: „Julle kan nie God en Mammon dien nie!” (Matthéüs 6:24). “Pas op en wees op julle hoede vir die hebsug” (Lukas 12: 15). “Hebsug moet onder julle selfs nie genoem word nie” (Efesiërs 5: 3). Ons het die verskriklike voorbeelde van Agan, van Judas, van Ananias en Saffira. Voor hulle almal het ons die voorbeeld van Lucifer, die “morester, seun van die dageraad,” wat 'n hoër rang begeer en daarom vir ewig die geluk van die hemel verbeur het. En ondanks al hierdie waarskuwings heers die begeerlikheid nog.

Sy slymerige spoor is orals te sien. Dit veroorsaak ontevredenheid en verdeeldheid in gesinne; by die armes verwek dit afguns en haat jeens die rykes; dit veroorsaak dat die rykes die armes onderdruk. En hierdie euwel bestaan nie net in die wêreld nie, maar ook in die kerk. Hoe algemeen is dit om selfs daar selfsug, inhaligheid, kullery, verwaarlosing van liefdadigheid en selfs berowing van God op die gebied van tiendes en offergawes aan te tref. Onder ons gemeentelêde “van onbesproke gedrag en wandel” is daar, helaas, talle Agans! Menige mens kom gereeld kerk toe en sit by die tafel van die Here aan terwyl daar onder sy besittings onwettige wins verberg is, dinge wat God gevloek het. Vir 'n mooi mantel uit Sinear sal talle mense die goedkeuring van hulle gewete en hulle hoop op die hemel opoffer.

Daar is talle wat hulle onkreukbaarheid en hulle begaafdheid om nuttig te wees vir 'n sak silwer verruil. Die noodroep van die armes val op dowe ore; die verbreiding van die evangelielig word verhinder; wêreldlinge sien met veragting neer op praktyke wat die Christelike belydenis loën; en nog hou die gierige belyer aan om vir hom skatte op te gaar. “Mag 'n mens God beroof? Want julle beroof My” (Maleagi 3:8), sê die Here.

Agan se sonde het vir die hele volk 'n ramp meegebring. Vir die sonde van een mens sal die misnoë van God op die kerk rus totdat die oortreding opgespoor en verwyder is. Die invloede waarvoor die kerk die meeste op sy hoede moet wees, is nie die invloed van openbare teenstanders, ongelowiges en lasteraars nie, maar van inkonsekwente belyers van Christus. Dit is hulle wat die seën van die God van Israel terughou en swakheid onder Sy volk veroorsaak.

Wanneer die kerk hom in die moeilikheid bevind, wanneer koudheid en geestelike agteruitgang bestaan wat aan die vyande van God die oorwinning gee, dan moet die lede nie hulle hande vou en oor hulle ongelukkige toestand kla nie, hulle moet eerder vemeem of daar 'n Agan in die kamp is. Met nederigheid en selfondersoek moet elkeen soek na sy eie bedekte sondes wat die deur teen die teenwoordigheid van God sluit.

Agan het sy misdaad erken, maar eers nadat dit te laat was vir hom om daarby te baat. Hy het gesien hoe die leërs van Israel verslaan en mismoedig van Ai terugkeer; maar hy het nog nie sy sonde bely nie. Hy het Josua en die oudstes in onbeskryflike droefheid met hulle aangesigte op die aarde sien lê. As hy toe sy sonde bely het, sou dit 'n bewys gewees het van berou; maar hy het nog geswyg. Hy het die bekendmaking gehoor dat 'n groot misdaad gepleeg was en selfs wat die aard daarvan was. Maar sy lippe het toe gebly. Toe kom die plegtige ondersoek. Hoe bevrees was hy in sy siel toe hy sien dat sy stam, sy familie, sy huisgesin aangewys word! Maar hy het niks bely voordat die vinger van God op hom gelê was nie. Eers toe, toe sy sonde nie meer bedek kon word nie, het hy die waarheid erken. Hoe dikwels word soortgelyke belydenisse gedoen. Daar is 'n hemelsbreë verskil tussen die erkenning van feite nadat hulle bewys is en die belydenis van sondes wat net aan ons en aan God bekend is. Agan sou sy sonde nie bely het as hy nie gehoop het dat hy sodoende die gevolge van sy misdaad sou vryspring nie. Maar sy belydenis het net gedien om te bewys dat sy straf regverdig was. Daar was geen egte berou oor sonde nie, geen skuldgevoel nie, geen afsku vir sonde nie.

So sal die skuldiges hulle sonde bely wanneer hulle voor die regterstoel van God staan nadat elke geval vir die lewe of vir die dood beslis is. Die gevolge wat hy self moet ly, sal van elkeen 'n erkenenis van sy sonde dwing. Dit sal deur 'n vreeslike gevoel van verdoemenis, 'n verskriklike verwagting van oordeel, afgepers word. Maar hierdie soort belydenis kan die sondaar nie red nie.

Daar is baie wat soos Agan voel dat hulle veilig is solank hulle, hulle sondes van hulle medemensse kan verberg en hulle stel hulle gerus dat God nie streng sal optree teen hulle oortreding nie. Te laat sal hulle sondes hulle uitvind wanneer daar vir ewig geen soenoffer meer vir hulle sonde is nie. Wanneer die boeke van die hemel oopgemaak word, sal die regter nie die mens se oortreding met woorde aan hom bekend stel nie, maar Hy sal net een deurdringende, oortuigende blik op elke daad werp, en elke daad van die lewe sal helder op die geheue van die misdadiger afgedruk word. Dit sal nie, soos in die dae van Josua, nodig wees om die persoon in elke stam, familie en gesin op te spoor nie; sy eie lippe sal die skande bely. Die sondes waarvan mense niks weet nie, sal dan aan die hele wêreld verkondig word.

Die Tiende

IN die Hebreeuse stelsel is een-tiende van die volk se inkomste afgesonder vir die instandhouding van die openbare aanbidding van God. Moses het Israel beveel: "Al die tiendes van die land, van die graan van die land, van die vrugte van die bome, behoort aan die Here; dit is heilig aan die Here." "Wat betref al die tiendes van beeste en kleinvee – alles wat onder die herderstaf deurgaen – die tiende moet aan die Here heilig wees." (Levitikus 27: 30, 32.)

Maar tiende heffing het nie by die Hebreërs ontstaan nie. Van die begin af het die Here Hom die tiende toegeëien en is hierdie eis erken en geëerbiedig. Abraham het aan Melgisedek, die priester van die allerhoogste God, tiende betaal (Genesis 14:20). Op Bet-el het Jakob, toe hy 'n balling en 'n swerweling was, aan die Here beloof: "Van alles wat U my gee, sal ek aan U sekerlik die tiendes afstaan" (Genesis 28:22). Toe Israel gereed was om as 'n nasie gevestig te word, is die wet betreffende tiende heffing herbevestig as een van die Goddelike instellings wat gehoorsaam moes word as hulle voorspoedig wou wees.

Die heffing van tiendes en offergawes was bedoel om 'n groot waarheid onder die aandag van die volk te bring, naamlik dat God die bron is van elke seëning wat Sy skepsele ontvang, en dat die mens Hom dank verskuldig is vir die goeie gawes van Sy voorsienigheid.

Hy gee self "aan almal lewe en asem en alles" (Handelinge 17:25). Die Here getuig: "Al die wilde diere van die bos is myne, die vee op berge by duisende" (Psalm 50: 10). "Aan My behoort die silwer en aan My die goud" (Haggai 2:8). En dit is God wat aan die mens die krag gee om rykdom te verwerf (Deuteronomium 8:18). Die Here het beveel dat almal moet erken dat alle dinge van Hom kom deur 'n deel van die seëninge in die vorm van geskenke en offergawes aan Hom terug te gee vir die onderhoud van Sy aanbidding.

Die tiendes... behoort aan die Here." Hier tref ons dieselfde uitdrukking aan as in die wet van die Sabbat: "Die sewende dag is die sabbat van die Here jou God" (Exodus 20:10). Die Here het 'n bepaalde gedeelte van die mensdom se tyd en van sy middele vir Hom uitgehou, en niemand kon enigeen van die twee vir sy eie doeleindes gebruik sonder om hom te besondig nie.

Die tiende moes oorgegee word vir die uitsluitlike gebruik van die Levi-ete, die stam wat afgesonder was vir die diens van die heiligdom. Maar die gifte vir godsdienstige doeleindes is volstrek nie tot die tiende beperk nie. Die tabemakel, en Daarna die tempel, is uitsluitlik van vrywillige offergawes opgerig, en Moses het beveel dat so dikwels die volk getel word, elkeen 'n halwe sikkil vir "die bediening van die tent van samekoms" moes gee sodat daar vir instandhouding en ander dienste voorsiening gemaak kon word. In Nehemia se tyd is daar jaarliks vir hierdie doel 'n bydrae gemaak. Kyk Exodus 30:12-16; 2 Konings 12:4, 5; 2 Kronieke 24:4-13; Nehemia 10:32, 33. Van tyd tot tyd is daar ook sond- en dankoffers aan die Here gebring. Tydens die jaarfeeste is groot hoeveelhede gegee. En daar is ruim voorsiening gemaak vir die armes.

Selfs voordat die tiende gehef is, het mense die aansprake van die Here erken. Die eersteling van elke oes van die land is aan Hom gewy. Die eerste wol wanneer die skape geskeer is, die eerste graan wanneer die koring gedors is, die eersteling van die olie en die wyn is vir God afgesonder. So ook die eersgeborenes van al die diere; en daar moes vir die eerste seun 'n losprys betaal word. Die eersteling moes by die heiligdom aan die Here gegee word waar dit dan aan die priesters vir hulle gebruik oorhandig is.

Op hierdie wyse is die volk gedurig daaraan herinner dat God die eintlike eienaar was van hulle lande, hulle kuddes en hulle kleinvee; dat Hy saaityd en oestyd, die sonskyn en die reen gestuur het, en dat Hy die Skepper was van alles wat hulle besit het - dat Hy hulle aangestel het as rentmeesters oor Sy goedere.

Toe die manne van Israel die eersteling van land en boord by die tabemakel kom aflaai het, het hulle die goedheid van God in die openbaar erken. Wanneer die priester die Offer ontvang het, het die offeraar, asof hy in die teenwoordigheid van Jehova praat, gesê: "My vader was 'n swerwende, Arameër;" dan het hy sy verblyf in Egipte en die verdrukking waaruit God Israel verlos het, beskryf: "Die Here het ons uit Egipte uitgelei deur 'n sterke hand en 'n uitgestrekte arm en deur groot skrikwekkende daade en deur tekens en wonders." Dan het hy gesê: "Hy het ons na hierdie plek gebring en ons hierdie land gegee, 'n land wat oorloop van melk en heuning. Hier het ek dan nou die eersteling gebring van die vrugte van die land wat U, Here, my gegee het." (Deuteronomium 26:5, 8-11.)

Die Israeliete moes ruim een-vierde van hulle inkomste vir godsdien-

stige en liefdadigheidsdoeleindes afstaan. Mens sou verwag dat so 'n swaar belasting op hulle inkomste hulle sou verarm; maar die getroue nakoming van hierdie reëls was intendeel een van die voorwaardes van hulle voorspoed. Op voorwaarde van hulle stipte gehoorsaamheid het God hulle beloof: "Ek sal ook die sprinkaan vir julle afweer, sodat hy die opbrings van julle grond nie sal verwoes nie; ook die wynstok op die land sal vir julle nie onvrugbaar wees nie... En al die nasies sal julle gelukkig prys, omdat julle die land van welbehag sal wees, sê die Here van die leërske" (Maleagi 3:11, 12).

'n Treffende voorbeeld van die gevolge van die selfsugtige terughou van vrywillige offergawes aan die saak van God is in die dae van die profeet Haggai gegee. Nadat hulle uit hulle Babiloniese ballingskap teruggekeer het, het die Jode ondemeem om die tempel van die Here te herbou; maar omdat hulle hardnekkige teenstand van hulle vyande ondervind het, het hulle die werk gestaak; en 'n groot droogte wat hulle in werklike armoede gedompel het, het hulle oortuig dat dit vir hulle onmoontlik was om die herbouing van die tempel te voltooi. Hulle het gesê: "Nog het die tyd nie gekom, die tyd dat die huis van die Here gebou moet word nie." Maar die profeet van die Here het 'n boodskap aan hulle gebring: "Is dit vir julleself wel tyd om in julle betimmerde huise te woon, terwyl hierdie huis in puin lê? So sê die Here van die leërske dan nou: Gee ag op wat julle wedervaar het: julle het baie gesaai, maar min ingebring; julle het geëet, maar nie tot versadiging nie; julle het gedrink, maar nie genoeg gekry nie; julle het jul geklee, maar nie warm geword nie; en wie hom vir loon verhuur, verhuur hom om dit in 'n stukkende beurs te steek." (Haggai 1:2-6.) Dan word die rede verstrekt: "Julle het uitgesien na baie, en kyk, dit het min geword; en julle het dit in die huis gebring, maar Ek het dit weggeblaas. Waarom? spreek die Here van die leërske. Ter wille van my huis wat in puin lê, terwyl elkeen van julle vir sy eie huis hardloop. Daarom het die hemel bo julle die dou ingehou en die aarde het sy opbrings teruggehou. En Ek het droogte oor die land geroep en oor die berge en oor die koring en oor die mos en oor die olie en oor alles wat die grond oplewer; en oor die mense en oor die diere en oor alle arbeid van die hande." (Verse 9-11.) "In die tyd het iemand gekom by 'n koringmied van twintig maat, en daar was maar tien; hy het gekom by die parskuip om vyftig emmers te skep, en daar was maar twintig. Ek het julle swaar getref met brandkoring en heuningdou en hael al die werk van julle hande." (Haggai 2:16, 17.)

Deur die bestraffing aangespoor, het die volk die huis van God weer begin bou. Toe kom die woord van die Here tot hulle: "Merk tog op, van hier die dag af terug, van die vieren-twintigste dag van die negende maand, naamlik van die dag af toe hulle die fondament van die tempel van die Here gelê het;... van hierdie dag af sal Ek seën" (Verse 18, 19).

Die wyse man sê: "Daar is een wat ruim uitdeel en nog meer kry, en een wat terughou meer as wat reg is, maar tot sy gebrek." Spreuke 11: 24. En in die Nuwe Testament leer die apostel Paulus dieselfde les: "Wie spaarsaamlik saai, sal ook spaarsaamlik maai; en wie volop saai, sal ook volop maai." "God het mag om alle genade oorvloedig oor julle te laat wees, sodat julle altyd in alle opsigte volop kan hê en oorvloedig kan wees tot elke goeie werk." 2 Korinthiërs 9:6, 8.

God wou hê dat Sy volk Israel die lig aan al die bewoners van die aarde moes oordra. Deur Sy openbare aanbidding te onderhou, het hulle van die bestaan en oppermag van die lewende God getuig. En dit was hulle voorreg om hierdie aanbidding te onderhou om van hulle trou en hulle liefde teenoor Hom te getuig. Die Here het dit so verorden dat die verspreiding van lig en waarheid op aarde afhanklik moet wees van die arbeid en die offergawes van diegene wat deelgenote is in die hemelse gawe. Hy kon engele aangestel het as gesante van Sy waarheid; Hy kon Sy wil, soos op Sinai, met Sy eie stem bekend gemaak het; maar in Sy oneindige liefde en wysheid het Hy mense geroep om Sy medearbeiders te wees deur hulle te kies om hierdie werk te doen.

In die dae van Israel was die tiende en die vrywillige offergawes nodig om die godsdiensinstelling te onderhou. Behoort die volk van God in hierdie eeu dan minder te gee? Die beginsel wat Christus neergelê het, is dat ons offers aan God in verhouding behoort te wees met die lig en voorregte wat ons geniet. "Elkeen aan wie veel gegee is, van hom sal veel gevorder word." Lukas 12:48. Toe die Heiland Sy dissipels uitgestuur het, het Hy aan hulle gesê: "julle het dit verniet ontvang, verniet moet julle dit gee" (Matthéüs 10:8). Namate ons meer seëninge en voorregte ontvang – veral omdat ons die ongeëwenaarde selfopoffering van die heerlike Seun van God as voorbeeld het - behoort ons ons dankbaarheid nie met ruimer offergawes te betuig sodat die verlossingsboodskap ook aan andere oorgedra kan word nie? Namate die evangeliewerk uitbrei, vereis dit ook groter ondersteuning as in die ou tyd, en dit maak die wet van tiendes en offergawes 'n dringender noodsaaklikheid as selfs in die dae van die

Joodse bedeling. As Sy volk Sy saak ruim deur middel van hulle vrywillige offergawes sou ondersteun pleks daarvan dat hulle onchristelike en onheilige metodes aanwend om die skatkis vol te maak, sou hulle God vereer en baie meer siele sou vir Christus gewin word.

Moses se plan om middele vir die bou van die tabemakel te versamel, het uitmuntend geslaag. Geen aansporing was nodig nie. Hy het hom ook nie tot die metodes gewend waarvan soveel kerke in ons tyd gebruik maak nie. Hy het geen groot fees gehou nie. Hy het die mense nie na plesier, danspartye of ander openbare vermaaklikhede genooi nie; ook het hy nie van loterye of iets anders van so 'n ongewyde aard gebruik gemaak om middele te kry vir die oprigting van die tabemakel van God nie. Die Here het Moses beveel om die kinders van Israel te nooi om hulle offergawes te bring. Hy moes geskenke neem van elkeen wat dit gewilliglik uit sy hart gee. En daar het soveel offergawes gekom dat Moses die volk moes beveel om nie meer te bring nie, want hulle het meer gegee as wat gebruik kon word.

God het mense as Sy rentmeesters aangestel. Die besittings wat Hy in hulle hande toevertrou het, is die middele wat Hy voorsien het vir die verbreiding van die evangelie. Aan diegene wat bewys dat hulle getroue rentmeesters is, sal Hy 'n groter pand toevertrou. Die Here sê:

"Die wat My eer, sal Ek eer" (1 Samuel 2:30). "God het 'n blymoedige gewer lief," en wanneer Sy volk hulle geskenke en offergawes uit dankbare harte aan Hom gee," nie met droefheid of uit dwang nie," sal Hy hulle seën soos Hy beloof het." Bring die hele tiende na die skathuis. sodat daar spys in my huis kan wees; en beproef My tog hierin, sê die Here van die leërskare. of Ek vir julle nie die vensters van die hemel sal oopmaak en op julle 'n oorvloedige seën sal uitstort nie." Maleagi 3:10.

Offergawes

Om die volk aan te moedig om die eredienste by te woon en om vir die armes te sorg, is 'n tweede tiende van hulle wins vereis. Aangaande die eerste tiende het die Here gesê: "Ek gee aan die kinders van Levi al die tiendes in Israel" (Numeri 18:21). Maar aangaande die tweede tiende het Hy beveel: "Jy moet voor die aangesig van die Here jou God op die plek wat Hy sal uitkies om sy Naam daar te laat woon, die tiendes eet van jou koring, van jou mos en van jou olie en die eersgeborenes van jou beeste en van jou kleinvee, dat jy kan leer om die Here jou God altyd te vrees" (Deuteronomium 14:23, 29; 16:11-14). Hierdie tiende, of dieselfde waarde in geld, moes hulle twee agtereenvolgende jare na die plek bring waar die heiligdom gestaan het. Nadat hulle aan die Here 'n dankoffer en aan die priester 'n vasgestelde deel gegee het, moes die offeraars die oorskiet gebruik om 'n godsdienstige fees te hou waaraan die Leviet, die vreemdeling, die wees en die weduwee moes deelneem. Op hierdie manier is voorsiening gemaak vir die dankoffers en die feeste tydens die jaarlikse feeste, en terselfdenyd is die volk met die priesters en die Leviëte in aanraking gebring sodat hulle die geleentheid kon hê om in die diens van God onderrig en bemoediging te ontvang.

Al om die derde jaar moes hierdie tweede tiende egter tuis gebruik word om die Leviet en die arme te onthaal, soos Moses gesê het, "dat hulle in jou poorte kan eet en versadig word" (Deuteronomium 26:12). Hierdie tiende sou die middele voorsien om gasvryheid en weldadigheid te betoon.

Daar is ook nog ander voorsiening vir die armes gemaak. Benewens sy erkenning van die eise van God, is daar niks wat die wette van Moses meer kenmerk as sy aandrang op 'n gees van milddadigheid, barmhartigheid en gasvryheid teenoor die armes nie. Hoewel God beloof het om Sy volk ryklik te seën, was dit nogtans nie Sy bedoeling dat daar geen armoede onder hulle sou wees nie. Hy het gesê dat die land nooit sonder sy armes sou wees nie. Daar sou onder Sy volk altyd diegene wees wat op hulle weldadigheid, medelyde en teerhartigheid aanspraak sou maak. In daardie dae was daar net soos nou mense wat deur die ongeluk, deur siekte en deur die verlies van hulle besittings getref is; maar solank as wat hulle die bevel van God uitgevoer het, was daar nooit bedelaars of hongerlydendes onder hulle nie.

(Hierdie hoofsrug is hoofsrug 51 van *Patriarge en Profete*, bl. 530-536)

Die wet van God het aan die armes die reg gegee op 'n sekere gedeelte van die opbrengs van die grond. Wanneer iemand honger was, was hy geregtig om na sy naaste se land of sy boord of wingerd te gaan en genoeg te eet om sy honger te stil. Dit was ooreenkomstig hierdie verlot dat Jesus se dissipels op die Sabbatdag van die staande graan gepluk en geëet het terwyl hulle deur 'n land geloop het.

Al die oorskiet van die oesland, die boord en die wingerd het aan die armes behoort. "As jy jou oes op jou land insamel en . n gerf op die land vergeet," het Moses gesê, "mag jy nie omdraai om dit te gaan haal nie. ... As jy jou olywe afslaai, moet jy nie agter jou in die takke rondsoek nie. ... As jy jou wingerd oes, moet jy agter jou nie skoon afoes nie; vir die vreemdeling, die wees en die weduwee moet dit wees. En jy moet daaraan dink dat jy 'n slaaf was in Egipteland." Deuteronomium 24:19-22; Levitikus 19:9, 10.

Al om die sewende jaar is daar in besonder vir die armes voorsiening gemaak. Die sabbatjaar, soos dit genoem is, het net na die oestyd begin. Wanneer die saaityd na die insameling van die oes aangebreek het, moes die volk nie saai nie; hulle moes die wingerd nie in die lente bemes nie, en hulle moes nog graan- nòg druiweoes verwag. Wat die grond op sy eie voortgebring het, kon hulle vars eet, maar hulle moes daar niks van in hulle skure opgaar nie. Die opbrengs van daardie jaar was vir die vreemdeling, die wees, die weduwee en selfs vir die velddiere. (Exodus 23:10, 11; Levitikus 25:5.)

Maar as die veld dan in gewone jare net genoeg opgelewer het om in die behoeftes van die volk te voorsien, hoe moes hulle leef wanneer daar die jaar geen oes was nie? Daarvoor het die belofte van God ruim voorsiening gemaak. "Dan gebied Ek my seën vir julle in die sesde jaar," het Hy gesê, "en dit sal die oes vir die drie jare oplewer. En in die agtste jaar moet julle saai en van die ou opbrings eet tot die negende jaar toe; totdat die opbrings hiervan inkom, moet julle die oue eet." (Levitikus 25:21,22.)

Die waameming van die sabbatjaar moes vir sowel land as volk tot voordeel strek. Nadat die grond 'n jaar lank onbewerk gelê het, sou dit Daarna meer oplewer. Die mense is van die dringende werk op die landerye vrygestel, en hoewel daar verskeie soorte werk was wat hulle in daardie tyd kon verrig, het almal vrye tyd geniet wat hulle die geleentheid gegee het om uit te rus sodat hulle gereed kon wees vir die inspanning van die daaropvolgende jare. Hulle het meer tyd gehad vir bepeinsing en gebed en om bekend te raak met die leer en vereistes van die Here en om

hulle huisgesinne te onderrig.

In die sabbatjaar moes die Israelitiese slawe vrygestel word, en hulle moes nie met leë hande weggestuur word nie. Die bevel van die Here was: "En as jy hom as vryman van jou laat weggaan, moet jy hom nie met leë hande laat weggaan nie. Jy moet hom 'n behoorlike voorraad saamgee van jou kleinvee en jou dorsvloer en jou wynpers; waarin die Here jou God jou geseën het, daarvan moet jy aan hom gee." (Deuteronomium 15:13, 14.)

Die arbeider se loon moes dadelik betaal word. "Jy mag 'n arm en behoefte dagloner uit jou broers of uit jou vreemdelinge wat in jou land in jou poorte is, nie verdruk nie. Op die dag self moet jy sy loon gee, sodat die son oor hom nie ondergaan nie – want hy is arm en sy siel verlang Daarna." Deuteronomium 24:14,15.

Met betrekking tot die behandeling van slawe wat uit hulle diens gedros het, was daar ook spesiale opdragte. "Jy mag 'n slaaf wat van sy heer na jou ontsnap het, nie aan sy heer oorlewer nie. Hy moet by jou bly, in jou midde, in die plek wat hy in een van jou poorte uitkies, waar dit vir hom goed is; jy mag hom nie verdruk nie." Deuteronomium 23:15,16.

In die sewende jaar is die armes ook hulle skuld kwytgeskel. Die Hebreërs is gelas om hulle behoeftige broeders te alle tye te help deur geld renteloos aan hulle te leen. Hulle is uitdruklik verbied om van 'n arme woeker te neem. "En as jou broer by jou verarm en agter raak, moet jy hom ondersteun, soos 'n vreemdeling en bywoner, dat hy by jou kan lewe. Jy moenie rente of wins van hom neem nie, maar jy moet jou God vrees, dat jou broer by jou kan lewe. Jou geld mag jy hom nie op rente gee nie, en jou eetware mag jy nie teen wins gee nie." Levitikus 25: 35 - 37. As die skuld tot op die sabbatjaar onbetaald gebly het, kon die kapitaal ook nie ingevorder word nie. En die volk is ten strengste gewaarsku dat hulle nie weens hierdie bepalinge moes weier om nodige hulp aan hulle broeders te verstrek nie." As daar by jou 'n arme is, een uit jou broers,... dan moet jy jou hart nie verhard en jou hand nie toehou vir jou arm broer nie... Neem jou in ag, dat daar in jou hart geen slegte gedagte is nie, naamlik: Die sewende jaar, die jaar van kwytskelding, is naby – en jou oog dan jou arm broer skeef aankyk, en jy hom niks gee nie, en hy teen jou na die Here roep, en dit sonde in jou word." "Die arme sal in die land nie ontbreek nie; daarom gee ek jou bevel en sê: Jy moet jou hand wyd oopmaak vir jou broer, vir die ellendige en die arme in jou land," "en jy moet gewillig aan hom leen,

genoegsaam vir sy behoefte, wat hom ontbreek.” (Deuteronomium 15:7-9, 11, 8.)

Niemand hoef te vrees dat sy vrygewigheid hom behoeftig sal maak nie. Gehoorsaamheid aan die gebooie van God sou hulle gewis voorspoedig maak.. “Want die Here jou God seën jou soos Hy beloof het, sodat jy aan baie nasies sal uitleen, maar self nie hoef te leen nie; en jy sal oor baie nasies heers, maar oor jou sal hulle nie heers nie.” Deuteronomium 15:6.

Na “sewe jaarweke,” “sewe maal sewe jaar,” het die groot jaar van vrylating, die jubeljaar, aangebreek. “Dan moet jy... ’n basuingeklank... deur julle hele land laat gaan.

En julle moet die vyftigste jaar heilig en ’n vrylating in die land uitroep aan al sy bewoners. Dit moet vir julle ’n jubeljaar wees; dan moet julle elkeen na sy besitting en elkeen na sy geslag teruggaan.” Levitikus 25:9,10.

“In die sewende maand, op die tiende van die maand,... op die versoendag” moes die basuin van die jubeljaar klink. Deur die hele land, orals waar die Joodse volk gewoon het, het daardie klank op die kinders van Jakob ’n beroep gedoen om die jaar van vrylating te verwelkom. Op die groot Versoendag is daar versoening gedoen vir die sondes van Israel en die volk het die jubeljaar met vreugde begroet.

Soos in die sabbatjaar, moes daar op daardie jaar nie gesaai of geoes word nie, en alles wat die grond opgelewer het, was die regmatige besitting van die armes. Sekere klasse Joodse slawe – almal wat nie op die sabbatjaar vrygestel was nie – is nou vrygestel. Maar die vemaamste kenmerk van die jubeljaar was dat alle grond wat verpand was, aan die familie van die oorspronklike eienaar teruggegee moes word. God het die land by wyse van die lot laat verdeel. Nadat die verdeling gemaak is, het niemand die reg gehad om sy besitting te verkwansel nie. Hy kon sy grond ook nie verkoop tensy armoede hom daartoe gedwing het nie, en selfs dan, as hy of een van sy familieleden dit wou terugkoop, kon die koper nie weier om dit te verkoop nie; maar as dit nie voor die tyd verlos is nie, moes dit in die jubeljaar na die oorspronklike besitter of sy erfgename teruggaan.

Die Here het aan Moses gesê: “Die grond moet ook nie vir altyd verkoop word nie; want die land is myne, omdat julle vreemdelinge en bywoners by My is” (Levitikus 25:23). Die volk moes begryp dat die land aan God behoort en dat hulle net toegelaat is om dit tydelik te besit; dat Hy die

regmatige eienaar, die oorspronklike besitter, is, en dat Hy om die rede besondere bepalinge ten gunste van die armes en die verdruktes gemaak het. Hy wou almal laat verstaan dat die armes net so geregtig is op ’n plek op Gods wêreld as die rykes.

Dit is die voorsiening wat ons genadige Skepper gemaak het om lyding te versag, om in die lewe van die nooddruftiges en hulpbehoewendes ’n bietjie hoop, ’n glinstering van sonskyn te bring.

Die Here wou die buitensporige sug na besittings en mag onder bedwang hou. Groot euwels sou voortspruit uit die toenemende versameling van rykdom deur een klas en die armoede en verlaging van ’n ander. Sonder ’n mate van beperking sou die mag van die rykes ’n alleenreg word en die armes wat in alle opsigte in die oë van God net so verdienstelik is, sou deur hulle voorspoediger broeders behandel word asof hulle minderwaardig is. Die hartstogte van die armes sou deur die verdrukking opgewek word. Daar sou ’n gevoel van radeloosheid en wanhoop wees wat die maatskaplike orde sou verstoor en die deur tot allerlei misdade sou open. Die reëls wat God daargestel het, was bedoel om maatskaplike gelykheid te bevorder. Die maatreëls van die sabbatjaar en die jubeljaar sou in ’n groot mate alles regstel wat intussen op maatskaplike en politieke gebied in die land skeefgeloop het.

Hierdie bepalinge was bedoel om vir sowel die rykes as die armes tot seën te strek. Dit sou die hebsug en die strewe na selfverheffing aan bande lê en ’n edel gees van weldadigheid kweek; en deur goedgesindheid en vertrouwe by alle klasse aan te moedig, sou dit maatskaplike orde, die stabiliteit van die regering, bevorder. Ons is almal saamgeveg indie groot web van die mensdom, en wat ons ook al kan doen om ander te help en op te hef, sal vir onself tot seën strek. Die wet van onderlinge afhanklikheid geld die ganse maatskappy. Die armes is niks meer van die rykes afhanklik as die rykes van die armes nie. Terwyl die een klas ’n aandeel eis in die seëninge wat God op hulle ryk bure uitgestort het, het die ander weer die getroue diens, die krag van murg en brein en spier, nodig waaroor die armes beskik.

God het beloof om die Israeliete ryklik te seën as hulle Sy bevele nakom. Hy het gesê: “Ek (sal) julle reëns gee op die regte tyd, en die land sal sy opbrings gee, en die bome van die veld sal hulle vrugte gee. En die dorstyd sal vir julle aanhou tot die druiwe-oes, en die druiwe-oes sal aanhou tot die saaityd, en julle sal jul brood volop eet en veilig in julle land woon. Ook

sal Ek vrede gee in die land, sodat julle sal lê en rus sonder dat iemand julle skrikmaak; en Ek sal die wilde diere uit die land laat verdwyn, en geen swaard sal deur julle land trek nie... En Ek sal in jul midde wandel en vir julle 'n God wees, en julle sal vir My 'n volk wees... Maar as julle nie na My luister en al hierdie gebooie doen nie; en... my verbond verbreek - dan sal... julle... ook tevergeefs julle saad saai, want julle vyande sal dit opeet. En Ek sal my aangesig teen julle rig, sodat julle voor jul vyande verslaan word; en julle haters sal oor julle heers, en julle sal vlug terwyl niemand julle agtervolg nie." (Levitikus 26:4-17.)

Daar is baie mense wat met groot ywer daarop aandring dat almal 'n gelyke aandeel in die seëninge van God moet hê. Maar dit was nie die doel van die Skepper nie. 'n Verskeidenheid van lewensomstandighede is een van die middele waardeur God van plan is om ons karakter te ontwikkel. Nogtans is dit Sy bedoeling dat diegene wat aardse besittings het, hulle bloot as rentmeesters van Sy goedere moet beskou, as persone aan wie middele toevertrou is sodat dit tot voordeel van die lydendes en die behoeftiges aangewend kan word.

Christus het gesê dat die armes altyd onder ons sal wees, en Hy vereenselwig Hom met Sy lydende mense. Die hart van ons Verlosser simpatiseer met Sy armste en nederigste aardse kinders. Hy vertel ons hulle is Sy verteenwoordigers op aarde. Hy het hulle onder ons gesit om in ons harte daardie liefde op te wek wat Hy vir die lydendes en onderdruktes voel. Christus aanvaar die medelyde en weldadigheid wat ons aan hulle bewys asof dit aan Hom self bewys is. 'n Daad van wreedheid of nalatigheid teenoor hulle word beskou asof dit aan Hom gedoen is.

Indien die mensdom die insettinge wat God tot voordeel van die armes gegee het, nagekom het, hoe anders sou die huidige toestand van die wêreld sedelik, geestelik en tydelik gewees het! Selfsug en eiwaan sou nie soos nou geheers het nie, maar elk sou welwillend aan die geluk en welvaart van ander dink; en die wydverspreide armoede wat in baie lande heers, sou nie nou bestaan nie.

Die beginsels wat God neergelê het sou die vreeslike euwels verhoed wat in alle eeue die gevolg was van die onderdrukking van die armes deur die rykes en die agterdog en haat wat die armes teenoor die rykes koester. Terwyl dit verhinder dat mense groot rykdom ophoop en onbepaalde weelde geniet, sal dit ook die gevolglike onkunde en verlaging verhoed van tienduiseende te laag besoldigde arbeiders wat hierdie kolossale ryk-

domme met hulle arbeid moet opbou. Dit sou 'n vreedsame skikking te weegbring vir die probleme wat tans dreig om die wêreld aan regering-loosheid en bloedvergieting oor te gee.

'n Weduwee Gevoed

'n TYD LANK het Elia tussen die berge by die spruit Krit versteek gebly. Daar is hy maande lank op wonder-bare wyse van voedsel voorsien. Toe die spruit later weens die aanhoudende droogte opgedroog het, het God Sy dienskneg beveel om in 'n heidense land 'n skuilplek te soek. "Maak jou klaar," het Hy hom beveel, "gaan na Sarfat wat by Sidon is, en bly daar; kyk, daar het Ek aan 'n weduwee bevel gegee om jou te onderhou."

Daardie vrou was nie 'n Israeliet nie. Sy het nooit die voorregte of seëninge ondervind wat die uitverkore volk van God geniet het nie; maar sy het in die ware God geglo en die lig gevolg wat op haar weg geskyn het. En toe daar vir Elia geen veiligheid meer in die land van Israel was nie, het God hom na hierdie vrou gestuur om in haar huis onderdak te vind.

"Daarop het hy hom gereed gemaak en na Sarfat gegaan; en toe hy by die ingang van die stad kom, was 'n weduwee juis besig om daar houtjies bymekaar te maak. En hy roep haar en sê: Gaan haal tog vir my 'n bietjie water in die kan, dat ek kan drink. Terwyl sy loop om dit te gaan haal, roep hy na haar en sê: Bring vir my 'n stukkie brood saam."

In hierdie armoedige gesin het die hongersnood swaar gedruk, en dit het geskyn asof die skamele voorraad gedaan was. Die koms van Elia op die juiste dag toe die weduwee gevrees het sy sal die stryd om die lewe te behou gewonne moet gee, het haar geloof in die krag van die lewende God om in haar behoefte te voorsien tot die uiterste toe beproef. Maar selfs in haar uiterste nood het sy vir haar geloof getuig deur tot die versoek van 'n vreemdeling in te willig om haar laaste stukkie kos met hom te deel.

In antwoord op Elia se versoek om voedsel en drank het die weduwee gesê: "So waar as die Here u God leef, ek het nie 'n broodkoek nie, net maar 'n handvol meel in die pot en 'n bietjie olie in die kruik; en hier maak ek nou 'n paar houtjies bymekaar; dan gaan ek en maak dit vir my en my seun klaar, dat ons dit kan eet en sterwe." Elia het aan haar gesê: "Wees nie bevrees nie, gaan heen, doen volgens jou woord; maar maak eers daarvan vir my 'n broodkoekie en bring dit uit vir my; Daarna kan jy vir jou en jou seun iets klaarmaak. Want so sê die Here, die God van Israel: Die meel in die pot sal nie opraak en die olie in die kruik sal nie minder word nie, tot op die dag dat die Here rëen op die aarde sal gee."

(Hierdie hoofstuk is hoofstuk 10 van *Prop bets and Kings*, bl. 129-131)

Mens kon geen groter beproewing van haar geloof gevra het nie. Tot nog toe het die weduwee alle vreemdelinge vriendelik en gasvry behandel. Ondanks die lyding wat dit vir haar en haar kind kon beteken, en met volle vertroue dat die God van Israel in haar behoefte kon voorsien, het sy aan die hoogste eis van gasvryheid voldoen, en gehandel volgens die woord van Elia.

“Hierdie Feniciëse vrou het geweldige gasvryheid aan die profeet van God bewys en haar geloof en edelmoedigheid is geweldig beloon. “Sy het geëet - sy en haar gesin dae lank: die meel in die pot het nie opgeraak en die olie in die kruik nie minder geword nie, volgens die woord van die Here wat Hy deur die diens van Elia gespreek het.

“Na hierdie dinge het die seun van die vrou, die eienares van die huis, siek geword; en sy siekte was baie ernstig, totdat daar geen asem in hom oorgebly het nie. Toe sê sy vir Elia: Wat het ek met u te doen, man van God! U het na my gekom om my ongeregtigheid in gedagtenis te bring en my seun dood te maak!

“Maar hy antwoord haar: Gee jou seun vir my. En hy het hom van haar skoot af geneem en hom opgedra na die bokamer waar hy self gewoon het, en hom op sy bed neergelê... Daarop het hy hom drie maal uitgestrek oor die kind en die Here aangeriep... En die Here het Elia verhoor; en die siel van die kind het in hom teruggekeer, sodat hy weer lewendig geword het.

“Daarop neem Elia die kind en bring hom af uit die bokamer in die huis en gee hom aan sy moeder; en Elia sê:

Kyk, jou seun lewe! En die vrou sê vir Elia: Nou weet ek dit dat u 'n man van God is en dat die woord van die Here in u mond waarheid is.”

Die weduwee van Sarfat het haar stukkie kos met Elia gedeel en as beloning is haar lewe en haar seun se lewe gespaar. En aan almal wat in 'n tyd van beproewing en gebrek medelyde en hulp verleen aan andere wat groter behoefte het, het God 'n groot seën belowe. Hy het nie verander nie. Sy krag is deesdae niks minder as in die dae van Elia nie.

Om te Gee Is om te Leef

En daar was sommige Grieke onder die wat opgekom het om op die fees te aanbid; hulle het na Filippus gegaan wat van Betsaida in Galilea was, en hom gevra en gesê: My heer, ons wil Jesus graag sien. Filippus kom en sê dit vir Andreas, en Andreas en Filippus vertel dit weer aan Jesus.”

Op hierdie tydstip het die werk van Christus na 'n volslae neerlaag gelyk. Hy was die oorwinnaar in die stryd met die priesters en Fariseërs, maar dit was duidelik dat hulle Hom nooit as die Messias sou aanvaar nie. Die skeiding het finaal aangebreek. Sy dissipels het sake hopeloos gevind. Maar Christus was op die drumpel van die voleindiging van Sy werk. Die groot gebeurtenis waarby nie net die Joodse volk nie, maar die hele wêreld betrokke was, sou weldra plaasvind. Toe Christus die gretige versoek hoor: “Ons wil Jesus graag sien,” het Hy daarin die hongerige geroep van die wêreld gehoor, en het Sy gelaat verhelder. “Die uur het gekom,” het Hy gesê, “dat die Seun van die mens verheerlik moet word.” In die versoek van die Grieke het Hy 'n voorsmaak gekry van die resultate van “Sy groot offer.

Hierdie manne het uit die Weste gekom om die Heiland aan die einde van Sy sending te sien, net soos die wyse manne aan die begin uit die Ooste gekom het. Met Christus se geboorte was die Joodse volk so behep met hul eie ambisieuse planne dat hulle nie bewus was van Sy koms nie. Die wyse manne uit 'n heidense land het met hul geskenke na die krip gekom om die Heiland te aanbid. So het hierdie Grieke, wat die nasies, stamme en volke van die wêreld verteenwoordig het, na Jesus gekom. So sal die volke van alle lande en alle eeue deur die kruis van die Verlosser getrek word. So sal baie “kom uit die ooste en weste en saam met Abraham en Isak en Jakob... aansit in die koninkryk van die hemele” (Matthéüs 8: 11).

Die Grieke het gehoor van Christus se triomfantelike intog in Jerusalem. Sommige het veronderstel en het die tyding versprei dat Hy die priesters en owerstes uit die tempel verdryf het en dat Hy Dawid se troon sou bestyg en as koning van Israel sou regeer. Die Grieke wou graag die waarheid aangaande Sy sending weet. “Ons wil Jesus graag sien,” het hulle gesê. Die versoek is toegestaan. Toe die versoek aan Jesus gerig is, was Hy in die deel van die tempel waar net Jode toegelaat is, maar Hy het in die

buitenste voorhof na die Grieke uitgegaan, waar Hy 'n persoonlike onderhoud met hulle gevoer het.

Die uur vir die verheerliking van Christus het aangebreek. Hy het in die skaduwee van die kruis gestaan, en die navrae van die Grieke het aan Hom getoon dat die offer wat Hy op die punt was om te bring baie seuns en dogters na God sou lei. Hy wis dat die Grieke Hom weldra in 'n posisie sou sien waarvan hulle nie gedroom het nie. Hulle sou Hom langs Barabbas, 'n rower en moordenaar, sien staan, wat bo die Seun van God vir vrylating gekies sou word. Hulle sou hoor hoe die volk, deur die priesters en owerstes aangehits, hul keuse sou maak. En op die vraag:

“Wat moet ek dan doen met Jesus wat genoem word Christus?” sal geantwoord word: “Laat Hom gekruisig word” (Matthéüs 27:22). Christus wis dat Hy deur so vir die sondes van die mens versoening te bewerkstellig, Sy koninkryk sou vervolmaak en oor die hele wêreld sou verbrei. Hy sou die Hersteller wees, en Sy Gees sou oorwin. 'n Oomblik het Hy in die toekoms gekyk en die stemme in alle dele van die aarde hoor roep: “Daar is die Lam van God wat die sonde van die wêreld wegneem” (Johannes 1:29). In hierdie vreemdelinge het Hy die belofte van 'n groot oes gesien, wanneer die skeidsmuur tussen Jood en heiden afgebreek sou word en alle nasies, tale en volke die boodskap van verlossing sou hoor. Hierdie verwagting, die vervulling van Sy hoop, word uitgedruk in die woorde: “Die uur het gekom dat die Seun van die mens verheerlik moet word.” Maar hoe die verheerliking sou plaasvind, was nooit uit die gedagte van Christus nie. Die insameling van die heidene sou volg op Sy naderende dood. Net deur Sy dood kon die wêreld gered word. Soos 'n koringkorrel, moet die Seun van die mens in die grond gewerp word; maar Hy sou weer lewe.

Christus het Sy toekoms geskets en met die verskynsels van die natuur veraanskoulik, sodat die dissipels kon verstaan. Die ware resultaat van Sy sending sou deur Sy dood bereik word. “Voorwaar, voorwaar Ek sê vir julle, as die koringkorrel nie in die grond val en sterf nie, bly dit alleen; maar as dit sterf, dra dit veel vrug.” As die koringkorrel in die grond val en sterf, ontkiem dit en dra vrugte. So sou die dood van Christus lei tot vrugte vir die koninkryk van God. Net soos met die wet van die planteryk, is lewe die gevolg van Sy dood.

Landbouers het hierdie illustrasie altyd voor hulle. Jaar na jaar verseker die mens sy voorraad graan deur skynbaar die beste deel daarvan weg te gooi. 'n Tyd lank moet dit onder die grond verberg word, om deur die Here

bewaak te word. Dan verskyn die sprietjie, dan die aar en dan die koring in die aar. Maar dit kan nie gebeur tensy die graan onsigbaar begrawe word nie-verberg en oënskynlik verlore.

Die saad wat in die aarde begrawe word, bring vrugte voort, en op sy beurt word dit geplant. So word die oes vermenigvuldig. So sal die dood van Christus op die kruis van Golgota vir die ewige lewe vrugte dra. Die betragting van hierdie offer sal die heerlijkheid wees van diegene wat, as die vrugte daarvan, deur die ewigheid sal lewe.

Die koringkorrel wat sy eie lewe bewaar, kan geen vrugte dra nie.

Dit bly alleen. Christus kon, as Hy dit sou verkies, aan die dood ontkom. Maar as Hy dit sou doen, sou Hy alleen moet wees. Dan sou Hy geen seuns en dogters na God kon bring nie. Net deur Sy lewe op te offer, kon Hy lewe aan die mense gee. Net deur in die grond te val en te sterf, kon Hy die saad van daardie ontsaglike oes word-die groot menigte wat uit elke nasie en stam en taal en volk vir God vrygekoop sou word.

Aan hierdie waarheid verbind Christus die les van selfopoffering wat almal moet leer: “Wie sy lewe liefhet, sal dit verloor; maar wie sy lewe haat in hierdie wêreld, sal dit bewaar vir die ewige lewe.” Almal wat vrugte wil dra as medewerkers van Christus, moet eers in die grond val en sterf. Die lewe moet in die akker van die wêreld se behoefte gegooi word. Eie liefde en eiebelang moet omkom. En die wet van selfopoffering is die wet van selfbehoud. Die landbouer behou sy graan deur dit weg te gooi. So ook in die lewe. Om te gee is om te lewe. Die lewe wat behoue sal bly, is die lewe wat vrylik gegee word in die diens van God en die mens. Wie hul lewe ter wille van Christus in hierdie wêreld opoffer, sal dit vir die ewige lewe behou.

Die lewe wat aan onself gewy word, is soos graan wat geëet word. Dit verdwyn, maar daar is geen toename nie. 'n Mens kan soveel moontlik vir homself bymekaar maak; hy kan net vir homself lewe en dink en beplan; maar sy lewe gaan verby, en hy het niks. Die wet van selfdiens is die wet van selfvernietiging.

Die Fees in Simon se Huis

Simon van Betanié is as 'n dissipel van Jesus beskou. Hy was een van die min Fariseërs wat hom openlik onder Christus se volgelinge geskaar het. Hy het Jesus as 'n leraar erken, het gehoop dat Hy dalk die Messias sou wees, maar het Hom nie as Verlosser aangeneem nie. Sy karakter was nie veruue nie; sy beginsels was onveranderd.

Simon is van melaatsheid genees, en dit is wat hom na Jesus getrek het. Hy wou sy dank betoon, en met Christus se laaste besoek aan Betanié het hy 'n maaltyd vir die Heiland en Sy dissipels klaargemaak. Baie Jode het dit bygewoon. Dit was 'n tyd van opwinding in Jerusalem. Christus en Sy sending het groter aandag as ooit geniet. Die gaste het Sy bewegings noukeurig dopgehou – party van hulle met onvriendelike oë.

Die Heiland het net ses dae voor die Pasga in Jerusalem aangekom, en oudergewoonte het Hy in die huis van Lasarus gaan rus. Die skares wat na die stad voortgereis het, het dit bekend gemaak dat Hy op pad na Jerusalem was, en dat Hy die Sabbat in Betanië sou rus. Groot geesdrif het onder die volk geheers. Baie het na Betanië gestroom – party uit opregte belangstelling in Jesus, andere uit nuuskierigheid om hom te sien wat uit die dode opgewek was.

Baie het verwag dat Lasarus hulle 'n wonderlike beskrywing van die tonele na sy dood sou kon gee. Hulle was verbaas dat hy hulle niks vertel het nie. Hy het niks van hierdie aard te vertelle gehad nie. Die Bybel sê: “Die dooies weet glad niks nie... Hulle liefde sowel as hulle haat, ook hulle naywer, het lankal verdwyn” (Prediker 9:5,6). Maar Lasarus het 'n indrukwekkende getuigenis te lewer gehad in verband met die werk van Christus. Om hierdie doel is hy uit die dode opgewek. Met krag en oortuiging het hy verklaar dat Jesus die Seun van God is.

Verslae wat deur besoekers aan Betanië na Jerusalem teruggeneem is het die opwinding verhoog. Die volk was gretig om Jesus te sien en te hoor. Almal wou weet of Lasarus Hom na Jerusalem sou vergesel, en of die profeet op die Paasfees tot koning gekroon sou word. Die priesters en owerstes het besef dat hul houvas op die volk steeds verswak, en dit het hulle verder teen Jesus verbitter. Hulle kon skaars wag op 'n geleentheid om Hom vir goed van die toneel te verwyder. Met verloop van tyd het hulle begin vrees dat Hy dalk glad nie na Jerusalem sou kom nie. Hulle het

(Hierdie hoofstuk is hoofstuk 62 van *Die Koning van die Eeue*, bl. 557-568)

onthou hoe dikwels Hy hul moordplanne verydel het, en hulle het begin vrees dat Hy teen nou deur hul planne gesien het en daarom sou wegbly. Hulle kon skaars hul angs verberg en het mekaar gevra: "Wat dink julle, sal Hy nie na die fees kom nie?"

'n Vergadering van die priesters en Fariseërs is belê. Na die opwekking van Lasarus het die volk hulle so volkome aan die kant van Christus geskaar dat dit gevaarlik sou wees om Hom openlik te gryp. Die owerhede het dus besluit om Hom heimlik te arresteer en die verhoor so stil moontlik af te handel. Hulle het gehoop dat as dit bekend sou word dat Hy veroordeel is, die wispelturige openbare mening in hulle guns sou swaai.

Hulle wou Jesus so uit die weg ruim. Maar solank Lasarus geleef het, wis die priesters en rabbi's dat hulle nie veilig was nie. Net die bestaan van 'n man wat vier dae in die graf was en wat deur 'n woord van Jesus opgewek is, sou vroeër of later 'n reaksie uitlok. Die volk sou hulle op hul leiers wreek omdat hulle Een gedood het wat so 'n wonderwerk kon verrig. Daarom het die Joodse raad besluit dat Lasarus ook moet sterf. Dit is die uiterstes waartoe jaloesie en vooroordeel hul slawe kan dryf. Die haat en ongeloof van die Joodse leiers moes toeneem totdat hulle selfs die lewe sou neem van een wat deur die Almag uit die graf gered is.

Terwyl hierdie sameswering in Jerusalem aan die gang was, is Jesus en Sy vriende na die maaltyd van Simon genooi. Die Heiland het aan tafel gesit met Simon, wat Hy van 'n afskuwelike siekte genees het, aan Sy een kant, en Lasarus, wat Hy uit die dode opgewek het, aan die ander. Martha het die gaste bedien, maar Maria het ernstig geluister na elke woord wat Jesus gebesig het. In Sy genade het Jesus haar sondes vergewe, Hy het haar geliefde broer uit die graf uit ruggeroep, en Maria se hart het oorgeloop van dankbaarheid. Sy het Jesus hoor praat van Sy naderende dood, en in haar innige liefde en leed wou sy Hom graag vereer. Teen groot persoonlike opoffering het sy 'n albastefles "kosbare nardussalf" gekoop om Sy liggaam mee te salf. Maar nou dat baie begin sê het dat Hy op die punt was om tot koning gekroon te word, het haar droefheid in vreugde verander. Sy wou graag die eerste wees om haar Here te vereer. Toe breek sy die fles salf, giet die inhoud op die hoof en voete van Jesus uit; en terwyl sy wenend kniel, maak sy hulle met haar trane nat en droog Sy voete af met haar lang, los hare.

Sy het dit ongemerk probeer doen, en haar daad kon wel ongemerk verbygegaan het, was dit nie dat die geur van die salf die hele vertrek ge-

vul het en almal se aandag op haar gevestig het nie. Judas het die daad met misnoeë beskou. Pleks van te wag om te hoor wat Jesus daaroor te sê het, het hy sy ontevredenheid in fluistertone teenoor diegene om hom uitgespreek en Christus dit verwyt omdat Hy sulke verkwisting toelaat. Listig het hy dinge geïnsinueer wat ontevredenheid kon veroorsaak.

Judas was die dissipels se penningmeester, en van die bietjie geld wat hulle gehad het, het hy heimlik vir sy eie gebruik aangewend, wat weinig vir hulle in die beursie oorgelaat het. Hy was gretig om alles wat hy in die hande kon kry, in die beurs te sit. Geld is dikwels uit die beurs gehaal om die armes te help; en as iets gekoop is wat deur Judas as oorbodig beskou is, het hy gewoonlik gesê: Waarom die verkwisting? Hoekom is die geld daarvoor nie in die beurs gesit wat ek vir die armes dra nie? Maria se daad het so helder afgesteek teen sy selfsug dat hy in die skande gestee is; daarom moes hy, oudergewoonte, 'n waardige motief vir sy beswaar teen die geskenk voorhou. Hy het hom tot die dissipels gewend en gevra: "Waarom is hierdie salf nie vir driehonderd pennings verkoop en die geld, aan die armes gegee nie? En dit het hy gesê, nie omdat hy oor die armes besorg was nie, maar omdat hy 'n dief was en die beurs gehad het en die bydraes geneem het." Judas het geen medelye met die armes gehad nie. As Maria se salf verkoop was en die geld, in sy hande beland het, sou die armes geen baat daarby gevind het nie.

Judas was baie beïndruk deur sy eie bestuursvemuf, Hy het gevoel dat hy 'n baie beter finansier as sy mededissipels is, en hy het ook gesorg dat hulle hom in daardie lig beskou. Hy het hul vertrouwe gewin en 'n sterk invloed oor hulle uitgeoefen. Sy geveinsde meegevoel vir die armes het hulle om die bos gelei, en sy listige insinuasie het hulle ook wantrouig teenoor Maria se wydingsdaad gestem. Rondom die tafel is gemompel:

"Waarvoor is hierdie verkwisting? Want hierdie salf kon duur verkoop en die geld aan die armes gegee gewees het."

Maria het die kritiek gehoor. Sy het innerlik gebewe. Sy was bang haar suster sou haar haar spandabelheid verwyt. Dalk dink die Meester ook dat sy verkwistend is. Sy was op die punt om sonder verskoning weg te sluip, toe die stem van haar Meester gehoor word: "Laat haar staan, waarom val julle haar lastig?" Hy het gesien dat sy verleë en ongelukkig voel. Hy wis dat sy met hierdie daad haar dankbaarheid vir die vergifnis van haar sondes betoon het, en Hy het haar gerusgestel. Toe verhef Hy Sy stem bo die gemompel van kritiek en sê: "Sy het 'n goeie werk aan My gedoen. Want die

armes het julle altyd by julle, en wanneer julle wil, kan julle aan hulle goed doen; maar My het julle nie altyd nie. Wat sy kon, het sy gedoen. Sy het vooruit al my liggaam vir die begrafnis gesalf.”

Die geurige gawe wat Maria op die dooie liggaam van die Heiland wou uitgiet, het sy nou op Sy lewende liggaam gestort. By die begrafnis sou die soete geur maar net die graf gevul het; nou het dit Sy hart verbly met die versekering van haar geloof en liefde. Josef van Arimathea en Nikodemus het nie hul liefdegawes aan Jesus gebied toe Hy nog gelewe het nie. Met bittere trane het hulle hul kosbare speserye vir Sy koue, bewustelose liggaam gebring. Die vroue wat hul speserye na die graf gebring het, het dit tevergeefs gedoen, want Hy het opgestaan: Maar Maria het haar liefde op die Heiland uitgestort terwyl Hy nog bewus was van haar toewyding, en sy het Hom vir die begrafnis gesalf. En toe Hy deur die duisternis van Sy groot beproewing gegaan het, het Hy saam met Hom die gedagtenis van hierdie daad geneem – ‘n voorsmaak van die liefde wat Hy vir ewig van Sy verlostes sou ontvang.

Baie bring hul kosbare gawes vir die dode. Hulle staan om die koue, lewelose liggaam, en liefdeswoorde vloei vrylik. Teerheid, waardering, toegewydheid, alles word op die een uitgestort wat nie kan sien of hoor nie. As hierdie woorde gesprek was toe die vermoeide gees hulle so nodig gehad het, toe die oor kon hoor en die hart kon voel, hoe kosbaar sou hul geur nie gewees het nie!

Maria het die volle betekenis van haar liefdedaad nie besef nie. Sy kon haar beskuldigers nie antwoord nie. Sy kon nie verduidelik waarom sy hierdie geleentheid gekies het om Jesus te salf nie. Die Heilige Gees het haar gelei, en sy het Hom gehoorsaam. Die ingewing verwerdig hom nie om redes te gee nie. ‘n Ongesiene teenwoordigheid spreek tot die siel en gees en spoor die hart tot dade aan. Dit het sy eie regverdiging.

Christus het Maria die betekenis van haar daad meegedeel, en hierin het Hy haar meer gegee as wat Hy ontvang het. “Toe sy hierdie salf op my liggaam uitgooi het,” het Hy gesê, “het sy dit gedoen met die oog op my begrafnis.” Soos die albastefles gebreek is en die hele huis met sy geur gevul het, so sou die Christus sterf en Sy liggaam gebreek word; maar Hy sou uit die graf uit opstaan en die geur van Sy lewe sou die aarde vul. Christus het ons liefgehad en Hom vir ons oorgegee “as ‘n gawe en offer aan God tot ‘n lieflike geur” (Efesiërs 5:2).

“Voorwaar Ek sê vir julle,” het Christus gesê, “oral waar hierdie evange-

lie oor die hele wêreld verkondig word, daar sal ook gesprek word van wat sy gedoen het, tot ‘n gedagtenis aan haar.” In ‘n toekomsblik het die Heiland met oortuiging van Sy evangelie gepraat. Dit sou deur die hele wêreld verkondig word. En sover as wat die evangelie sou reik, sou Maria se geskenk sy geur versprei en sou harte deur haar spontane daad geseën word. Koninkryke sou opkom en val; die name van vorste en veroweraars sou vergeet word, maar hierdie vrou se daad sou onsterflik op die bladsye van die gewyde geskiedenis bly pryk. Tot die einde van die tyd sou die gebreekte albastefles die verhaal van God se oorstroomende liefde vir die gevalle mensdom vertel.

Maria se daad het sterk afgesteek by wat Judas op die punt was om te doen. Watter strawwe les kon Christus nie aan hom gegee het wat die saad van kritiek en bose gedagtes by die dissipels gesaai het nie! Hoe tereg kon die beskuldiger beskuldig geword het! Hy wat die motiewe van elke hart kan lees en elke optrede verstaan, sou daar voor die feesgangers donkere hoofstukke in die lewe van Judas kon blootgelê het. Die geveinsdheid waarop die verraaier sy kritiek gebaseer het, kon aan die kaak gestel gewees het; want, pleks van hom oor die armes te ontferm, het hy hulle beroof vandie geld wat vir hulle bedoel was. Verontwaardiging kon uitgelok gewees het oor sy onderdrukking van die weduwees, die wese en die dagloners. Maar as Christus Judas ontmasker het, sou dit as oorsaak vir die verraad aangegee geword het. En al is hy ‘n dief genoem, sou Judas simpatie ontvang het, selfs onder die dissipels. Die Heiland het hom nie verwyt nie en het so enige verskoning vir sy verraad vermy.

Maar Jesus se deurdringende blik op hom het Judas oortuig dat die Heiland dwarsdeur sy huigelary gesien het en sy snode, veragtelike karakter gelees het. En in Sy lof vir Maria, wie se daad so hewig veroordeel is, het Christus Judas bestraf. Voorheen het die Heiland hom nooit regstreeks bestraf nie. Nou het die bestraffing hom verbitter. Hy was vasberade om hom te wreek. Van die feestafel af het hy opgestaan en reguit na die paleis van die hoëpriester gegaan, waar hy die raad byeen gevind het en aangebied het om Jesus aan hulle uit te lewer.

Die priesters was verheug. Hierdie leiers van Israel het die voorreg gehad om Christus as hul Verlosser te ontvang, sonder geld en sonder prys. Maar hulle het die kosbare gawe wat hulle in die grootste teerheid en liefde aangebied is, geweier. Hulle het geweier om die verlossing wat kosbaarder as goud is, aan te neem, en het hul Here vir dertig silwerstukke

gekoop.

Judas het sy hebsug laat botvier totdat dit elke goeie trek in sy karakter oorweldig het. Hy het die offergawe nie aan Jesus gegun nie. Hy het gebrand van jaloesie dat die Heiland 'n geskenk sou ontvang wat vir aardse konings geskik is. Hy het sy Here vir 'n veel kleiner bedrag verkoop as wat die salf gekos het.

Die dissipels was nie soos Judas nie. Hulle het die Heiland liefgehad. Maar hulle het Sy verhewe karakter nie reg gewaardeer nie. As hulle besef het wat Hy vir hulle gedoen het, sou hulle gevoel het dat niks wat aan Hom gegee word, verkwis is nie. Die wyse manne uit die Ooste, wat so min van Jesus geweet het, het beter besef watter eer Hom toekom; hulle het kosbare geskenke aan die Heiland gebring en in hulde voor Hom neergebuiig toe Hy nog 'n baba was en 'n krip as wieg gehad het.

Christus waardeer opregte vriendskapsdade. As iemand Hom 'n guns bewys het, het Hy die dader met hemelse hoflikheid geseën. Hy het nie die eenvoudigste blom wat deur die hand van 'n kind gepluk is en aan Hom in liefde aangebied is, geweier nie. Hy het die gawes van kinders aangeneem en die gewers geseën en hul name in die boek van die lewe geskryf. In die Bybel word Maria se salwing van Jesus gebruik om haar van die ander Marias te onderskei. Liefde en respek wat aan Jesus betoon word, is bewys van geloof in Hom as die Seun van God. En die Heilige Gees noem, as bewyse van 'n vrou se getrouheid aan Christus: "As sy ... die voete van die heiliges gewas het, verdruktes gehelp en elke goeie werk nagestreef het" (Timotheus 5:10).

Christus het Hom verheug in Maria se verlange om die wil van haar Here te doen. Hy het die rykdom van suiwer liefde wat Sy dissipels maar nie kon verstaan Meester nie, aangeneem, Maria se drang om haar hierdie diens te bewys was vir Christus van meer waarde as al die kosbare salf ter wêreld, want dit het uitdrukking gegee aan haar waardering van die wêreld se Verlosser. Dit was die liefde van Christus wat haar gedring het. Die weergalose uitnemendheid van die karakter van Christus hef haar wese vervul. Die salf was 'n simbool van die hart van die geefster. Dit was die uiterlike vertoning van 'n liefde wat deur hemelse strome gevoed is totdat dit oorgeloop het.

Maria se daad was net die les wat die dissipels nodig gehad het om hulle te toon dat Christus die uitdrukking van hul liefde vir Hom sal waardeer. Hy was alles vir hulle, en hulle het nie besef dat hulle weldra nie meer Sy

teenwoordigheid sou geniet nie, dat hulle Hom weldra geen gebaar sou kon toon wat hul dankbaarheid vir Sy groot liefde sou te kenne gee nie. Christus se eensaamheid, afgesonder van, die hemelse howe en in die rol van 'n mens, is nooit behoorlik deur die dissipels besef nie. Hy was dikwels bedroef omdat Sy dissipels Hom nie gegee het wat Hom toegekom het nie, Hy wis dat as hulle onder die invloed van die hemelse engele was wat Hom vergesel het, ook hulle geen offer groot genoeg sou geag het om die geestelike liefde van die hart uit te druk nie.

Eers toe Jesus weg is, het hulle waarlik besef wat hulle alles vir Hom kon gedoen het om hul liefde en dankbaarheid te betuig toe Hy nog by hulle was. Toe Jesus nie langer by hulle was nie en hulle soos skape sonder 'n herder gevoel het, het hulle begin insien hoe hulle gunsies vir Hom kon gedoen het wat Hom bly sou maak het. Toe het hulle Maria nie meer verwyte nie, maar hulleself. As hulle maar net hul kritiek kon terugtrek en die indruk ongedaan kon maak dat hulle die armes waardiger as Christus beskou het om die geskenk te ontvang! Hulle het die teregwyding pynlik gevoel toe hulle die gekneusde liggaam van hul Here van die kruis afhaal.

Dieselfde leemte bestaan vandag in ons wêreld. Baie min mense besef wat Christus alles vir hulle beteken. As hulle dit besef het, sou hulle die groot liefde van Maria betoon het en sou die salwing vrylik geskied het. Die duur salf sou nie 'n verkwisting genoem gewees het nie. Niks sou te duur geag word om vir Christus te gee nie, en geen selfverloëning of selfopoffering te groot om om Sy onthalwe te verduur nie.

Die woorde van verontwaardiging: "Waarvoor is hierdie verkwisting?" het die grootste opoffering van alle tye - die gawe van Homself as die losprys vir 'n verlore wêreld - by Christus duidelik voor die gees geroep. Die Here sou so milddadig teenoor die mensdom wees dat daar nie sou gesê kon word dat Hy meer kon gedoen het nie. In die gawe van Jesus het God die ganse hemel gegee. Uit die menslike oogpunt gesien, is so 'n opoffering roekelose verkwisting. Menslik gesproke is die hele verlossingsplan 'n verkwisting van genade en hulpbronne. Oral kom ons selfverloëning en heelhartige opoffering teen. Die hemelse leërskaars kan wel verbaas neerkyk op die mensdom wat weier om opgehef en verryk te word met die oneindige liefde wat in Christus uitgedruk is. Hulle sou wel kon uitroep: "Waarvoor is hierdie verkwisting?"

Maar die versoening vir 'n verlore wêreld sou volledig, oorvloedig en

volkome wees: Die offer van Christus was uitermate oorvloedig om elke siel wat God geskape het, te bereik. Dit kon nie beperk word sodat dit nie te veel sou wees vir die aantal wat die groot Gawe sou aanneem nie. Mense word nie almal gered nie; tog is die verlossingsplan nie 'n verkwisting omdat dit nie alles bereik waarvoor sy milddadigheid voorsiening gemaak het nie. Daar moet genoeg en nog oor wees.

Simon die gasheer was deur Judas se kritiek op Maria se geskenk beïnvloed en hy was verbaas oor Jesus se gedrag. Sy Farisese trots was gekrenk. Hy wis dat baie van sy gaste Christus wantrouig en misnoegd bejeën het. In sy hart het Simon gesê: "Hy, as Hy 'n profeet was, sou geweet het wie en watter soort vrou dit is wat Hom aanraak; want sy is 'n sondaar."

Deur Simon van melaatsheid te genees, het Christus hom van 'n lewende dood gered. Maar nou het Simon getwyfel of die Heiland 'n profeet was. Omdat Christus toegelaat het dat die vrou Hom nader, omdat Hy haar nie verontwaardig afgesnou het as een wie se sondes te groot is om vergewe te word nie, omdat Hy nie getoon het dat Hy wis sy was 'n gevalle vrou nie, het Simon gedink Hy was nie 'n profeet nie. Jesus weet niks van hierdie vrou wat so vrypostig is nie, het hy gedink, of Hy sou nie toegelaat het dat sy aan Hom raak nie.

Maar dit was uit onkunde omtrent God en Christus dat Simon so gedink het. Hy het nie besef dat die Seun van God soos God moet optree nie – simpatiek, teder en genadig. Simon se weg was om Maria se boetediens te ignoreer. Dat sy Christus se voete kon soen en hulle met salf invryf, was teregend vir sy harde hart. As Christus 'n profeet was, het hy gedink, sou Hy sondaars herken en bestraf het.

Christus het sy onuitgesproke gedagte beantwoord met: "Simon, Ek het iets om jou te sê... 'n Sekere geldskietter het twee skuldenaars gehad; die een het vyfhonderd pennings geskuld en die ander een vyftig; en omdat hulle niks gehad het om te betaal nie, het hy dit aan altwee geskenk. sê nou, wie van hulle sal hom die meeste liefhê? En Simon antwoord en sê: Ek veronderstel die een aan wie hy die meeste geskenk het. En Hy antwoord hom: Jy het reg geoordeel."

Soos Natan met Dawid gemaak het, het Christus Sy teregwyding in 'n gelykenis gehul. Hy het dit aan Sy gasheer oorgelaat om oor homself oordeel te vel. Simon! het die vrou wat hy nou verag het, tot die sonde verlei. Hy het haar 'n diepe onreg aangedoen. Die twee skuldenaars in die gelykenis het Simon en die vrou voorgestel. Jesus het nie bedoel dat die

twee persone verskillende grade van verpligting moes voel nie, want elkeen was 'n dank verskuldig wat hulle nooit sou kon betaal nie. Maar Simon het hom regverdiger as Maria geag, en Jesus wou hom laat sien hoe groot sy skuld werklik was. Hy wou hom toon dat sy skuld groter as hare was – soveel groter as wat 'n skuld van vyfhonderd pennings teenoor 'n skuld van vyftig pennings is.

Simon het homself nou in 'n nuwe lig begin sien. Hy het gesien hoe Maria bejeën word deur Een wat meer as 'n profeet was. Hy het gesien dat Christus haar hart vol liefde en toewyding met 'n skerp profetiese oog gelees het. Hy het skaam geword en besef dat hy in die teenwoordigheid was van Een wat groter was as hy.

"Ek het in jou huis gekom," het Christus voortgegaan, "water het jy nie vir my voete gegee nie;" maar Maria het, met trane van berou, deur liefde gedring, my voete natgemaak en met die hare van haar hoof afgedroog. „'n Soen het jy My nie gegee nie; maar sy [wat jy verag] het, vandat sy ingekom het, nie opgehou om my voete te soen nie." Christus het Simon op die geleentheid gewys wat hy gehad het om sy liefde vir sy Heer te betoon, asook sy waardering vir wat Hy vir hom gedoen het. Onomwonde, maar met fyngevoelige hoflikheid het die Heiland Sy dissipels te verstaan gegee dat dit Hom seermaak dat Sy kinders versuim om hul dank aan Hom met woorde en liefdedade te betoon. ?

Die Ondersoeker van Harte het die motief deurvors wat Maria tot haar optrede beweeg het, en Hy het ook die gees geken wat gelei het tot Simon se woorde: "Sien jy hierdie vrou?" het Hy vir hom gesê. Sy is 'n sondaar. "Haar sondes wat baie is, is vergewe, want sy het baie liefgehad; maar hy vir wie weinig vergewe is, het weinig lief."

Simon se onverskilligheid en versuim teenoor die Heiland het getoon hoe weinig hy die genade wat hy ontvang het, gewaardeer het. Hy het gedink Hy doen Jesus 'n eer aan deur Hom na sy huis te nooi. Maar nou het hy homself gesien soos hy werklik was. Waar hy gedink het hy sien deur sy Gas, was dit sy Gas wat hom deurgekyk het. Hy het besef hoe reg Jesus hom beoordeel het. Sy godsdiens was 'n kleed van Fari-seïsme. Hy het die medelye van Jesus verag. Hy het Hom nie herken as die verteenwoordiger van God nie. Waar Maria se sondes haar vergewe was, was hy 'n onvergewe sondaar. Die onbuigbare maatstaf van geregtigheid wat hy op haar wou toepas, het hom nou veroordeel.

Simon was getref deur die vriendelikheid van Jesus om hom nie openlik

voor die gaste te bestraf nie. Hy is nie behandel soos hy wou gehad het Maria moet behandel word nie. Hy het gesien dat Jesus nie graag sy skuld voor andere aan die kaak wou stel nie, maar geprobeer het om hom met 'n opregte uiteensetting van die geval te oortuig en sy hart met innige ontferming te versag. 'n Krasse veroordeling sou Simon teen berou verhard het, maar 'n geduldige vermaning het hom van sy fout oortuig. Hy besef watter geweldige skuld hy aan sy Here verskuldig is. Sy hoogmoed is vemedier, hy het hom bekeer, en die trotse Fariseër het 'n nederige, selfopofferende dissipel geword.

Maria is as 'n groot sondares beskou, maar Christus was bewus van die omstandighede wat haar lewe gevorm het. Hy kon elke vonkie hoop in haar siel uitgeblus het, maar Hy het nie. Dit was Hy wat haar uit haar wanhoop en ondergang opgehef het. Sewe maal het sy gehoor hoe Hy die duiwels bestraf wat haar hart en gees beheers het. Sy het Sy geroep tot die Vader om haar ontwil gehoor. Sy wis hoe afstootlik die sonde vir Sy vlekkelose reinheid is, en in Sy krag het sy oorwin.

Toe haar geval, menslik gesproke, hopeloos voorgekom het, het Christus goeie hoedanighede in haar gesien. Hy het die goeie karaktertrekke in haar raakgesien. Die verlossingsplan het die mensdom voor groot moontlikhede gestel, en in Maria sou hierdie moontlikhede vervul word. Deur Sy genade het sy 'n deelgenoot aan die Goddelike natuur geword. Die een wat geval het en wie se gees die woonplek van duiwels geword het, is baie na aan die Heiland in gemeenskap en diens gebring. Dit was Maria wat aan Sy voete gesit en van Hom geleer het. Dit was Maria wat die kosbare olie op Sy hoof uitgegiet het en Sy voete met haar tranes gewas het. Maria het langs die kruis gestaan en Hom na die graf gevolg. Maria was die eerste by die graf na Sy opstanding. Dit was Maria wat eerste die herrese Heiland verkondig het.

Jesus is bekend met die omstandighede van elke siel. U kan sê: Ek is sondig, baie sondig. Miskien is u; maar hoe erger u is, hoe meer het u Jesus nodig. Hy wys geen wenende, berouvolle siel weg nie. Hy vertel nie aan andere alles wat Hy bekend kan maak nie, maar Hy nooi elke bewende siel om moed te skep. Almal wat na Hom kom vir vergifnis en herstel sal Hy oorvloediglik vergewe.

Christus kan die engele uit die hemele beveel om die skale te laat val. Sy grimmigheid op die wêreld uit te gooi en almal wat vol haat vir God is te verdelg. Hy kan hierdie klad uit Sy heelal uitwis. Maar Hy doen dit nie.

Hy staan vandag by die reukofferaltaar en bied aan God die gebede van diegene wat Sy hulp soek.

Jesus verhef die siele wat hulle na Hom wend en skuiling soek bo die beskuldigings en getwis van tonge. Geen mens of bose engel kan die vinger na hierdie siele wys nie. Christus verenig hulle met Sy eie Goddelik-menslike natuur. Hulle staan langs die groot Sonedraer, in die lig wat van die troon van God straal: "Wie sal beskuldiging inbring teen die uitverkorenes van God? God is dit wat regverdig maak. Wie is dit wat veroordeel? Christus is dit wat gesterf het, ja, meer nog, wat ook opgewek is, wat ook aan die regterhand van God is, wat ook vir ons intree." Romeine 8:33,34.

'n Veranderde Kerk

DIE laaste jare van die genadetyd gaan vir ewig verby. Die groot dag van die Here is voor die deur. Elke vermoë wat ons het, moet nou ingespan word om die wat dood in oortreding en sonde is, wakker te skud. ...

Die tyd het vir ons aangebreek om ag te slaan op wat die woord van God ons leer. Al Sy insettinge is daarop gemik om ons te bevoordeel. Hy doen 'n beroep op diegene wat hulle onder die bloedbevleete banier van Prins Emmanuel skaar, om te bewys dat hulle hul afhanklikheid van God en hulle aanspreeklikheid teenoor Hom besef deur aan Hom 'n deel terug te besorg van wat Hy aan hulle toevertrou. Hierdie geld moet aangewend word ter bevordering van die werk wat verrig moet word ooreenkomstig die opdrag wat Christus aan Sy dissipels gegee het.

Die volk van God is geroep tot 'n taak wat geld en toewyding verg. Die verpligtinge wat op ons rus, hou ons verantwoordelik om na die beste van ons vermoë vir die Here te werk. Hy verwag onverdeelde diensvaardigheid, 'n algehele toewyding van hart, siel, verstand en krag.

In die heelal is daar net twee plekke waar ons ons skatte kan belê -in die skathuis van God of in die van Satan, en alles wat nie aan die diens van God gewy word nie, word as Satan s'n geag, en versterk sy saak. Dit is die plan van God dat die middele wat aan ons toevertrou is, aangewend sal word om Sy koninkryk op te bou. Sy goedere word aan Sy rentmeesters toevertrou sodat dit noukeurig op so 'n manier aangewend sal word dat dit aan Hom 'n inkomste sal besorg vir die redding van siele. Op hulle beurt sal hierdie siele rentmeesters en medewerkers van Christus word, om die belange van God se saak te bevorder.

ONTVANG OM TE KAN GEE

In 'n gemeente waar daar lewe is, is daar altyd uitbreiding en groei. Daar is ook 'n voortdurende wisselwerking van neem en gee, ontvangs en terugbesorging van wat aan die Here behoort. Aan elke opregte gelowige skenk God Sy lig en Sy seën, en die gelowige dra dit in sy werk vir die Here weer aan ander oor. Namate hy gee van wat hy ontvang, verruim hy die vermoë om te kan ontvang. Daar ontstaan ruimte vir 'n nuwe invulling

(Hierdie hoofstuk is hoofstukke 7,8,9,10,12,13 en 14 van
Raad oor Rentmeesterskap, bl. 35-54 en 65-76)

van genade en waarheid. Die helderheid van die lig neem vir hom toe en sy kennis vermeerder. Om hierdie gee en ontvang draai die lewe en groei van die Kerk. Hy wat ontvang en nooit gee nie, hou spoedig op om te ontvang. As die waarheid nie van hom na ander uitvloei nie, verloor hy sy vermoë om te ontvang. Ons moet die dinge van die hemel deel as ons nuwe seëninge wil ontvang.

Dit is nie die Here se voorneme om na hierdie aarde te kom om goud en silwer ter bevordering van Sy werk te voorsien nie. Hy stel bronne tot beskikking van mense sodat hulle voortdurend deur hulle skenkings en offergawes Sy werk kan bevorder. Die hoofdoel waarvoor die gawes van God aangewend moet word, is om werkers op die oesland te onderhou. En as mense die kanale sal word waardeur die seën van die hemel na ander kan vloei, sal die Here sorg dat hierdie kanale vol bly. Om aan die Here terug te gee wat aan Hom behoort, maak mense nie arm nie; om dit te weerhou, werk armoede in die hand.

'n TYD VIR SPAARSAAMHEID EN OPOFFERING

God doen 'n beroep op Sy volk om te ontwaak en hulle verantwoordelikhede te besef. 'n Vloed van lig skyn uit Sy woord, en verwaarloosde verpligtinge moet nagekom word. Wanneer dit wel nagekom word deur aan die Here Sy eie tiendes en offergawes te gee, sal dit die weg oopstel vir die wêreld om die Here se boodskap te hoor soos Hy dit bepaal het.

Indien die liefde van God in die harte van ons mense sou woon en die gees van selfopoffering elke gemeentelid besiel, sou daar geen gebrek aan middele vir sendingwerk in die buurt en buiteland wees nie; ons bronne sou vermenigvuldig word, 'n duisend deure vir bruikbaarheid sou oopgaan en ons sou binnegenooi word. As die doel van God om die genadeboodskap na die wêreld te neem, volbring was, sou Christus al lankal gekom en die heiliges al hulle verwelkoming in die Godstad ontvang het.

Indien daar ooit 'n tyd vir opoffering was, dan is dit nou. My Broeders en Susters, beoefen spaarsin in u huise. Verwyder die afgode wat u in die plek van God gestel het. Versaak u selfsugtige plesier. Ek pleit met u, moenie middele uitgee om u huise te verfraai nie; want u geld behoort aan die Here, en aan Hom moet u rekenskap gee van hoe dit aangewend is. Moet nie die Here se geld gebruik om die giere van u kinders te bevredig nie. Leer hulle dat God aanspraak het op alles wat hulle besit, en dat niks ooit

daardie aanspraak tot niet kan maak nie.

Geld is 'n vereiste kleinood. Moet dit nie verkwis op diegene wat nie daaraan behoefte het nie. Iemand het u vrygewigheid nodig. Daar is in die wêreld diegene wat honger is en ly. U mag sê: Ek kan hulle nie almal voed nie. Maar deur Christus se voorbeeld van spaarsaamheid te volg, kan u een voed. "Maak die brokstukke bymekaar wat oorgeskiets het sodat niks verlore gaan nie." Dit is woorde wat gesprek is deur Hom wie se mag 'n wonderwerk verrig het om in die behoefte van 'n hongerige menigte te voorsien.

As u kwistige gewoontes het, verwyder dit onmiddellik uit u lewe. As u dit nie doen nie, sal u in alle ewigheid bankrot wees. Spaargewoontes, vlyt en nugterheid is 'n beter erflating aan u kinders as 'n groot bruidskat.

Op die aarde is ons pelgrims en vreemdelinge. Laat ons nie ons middele gebruik vir die bevrediging van begeertes wat God verwag ons moet onderdruk nie. Laat ons die geloof wat ons bely, reg voorstel deur ons behoeftes te beperk. Laat ons gemeentelike soos een man opstaan en met erns die werk aandurf, soos mense wat in die volle lig van die waarheid vir hierdie laaste dae wandel. ...

Wat is die waarde van ongekeerde rykdom as dit in duur woonhuise of in aandele opgehoop word? Hoe trek dit die skaal in vergelyking met die redding van siele vir wie Christus, die Seun van die oneindige God, gesterf het? -R. & H., 24 Des. 1903.

'n Voorreg en 'n Verantwoordelikheid

Die plegtigste waarhede wat nog ooit aan sterflinge toevertrou is, is aan ons gegee om aan die wêreld te verkondig. Ons werk is om hierdie waarhede te verkondig. Die wêreld moet gewaarsku word, en die volk van God moet getrou wees aan die taak wat aan hulle opgedra is. Hulle moet hulle nie in spekulاسie begewe nie en ook nie saam met ongelowiges handelondememings aangaan nie; want dit sou die werk wat aan hulle gegee is, belemmer.

Christus sê aan Sy volk: "Julle is die lig van die wêreld."

Dit is geen geringe saak dat die raad en doelstellings en planne van God so duidelik aan ons geopenbaar is nie. Dit is 'n wonderlike voorreg om die wil van God te kan verstaan soos dit in die vaste profetiese woord geopenbaar is. Dit plaas 'n groot verantwoordelikheid op ons. God verwag dat ons die kennis wat Hy aan ons gegee het, aan andere moet oordra. Dit is Sy

doel dat Goddelike en menslike instrumente in die verkondiging van die waarskuwende boodskap sal saamspan.—*R. & H.*, 28 Julie 1904.

Steun Buitelandse Sendingwerk

Die meegevoel van Gods volk behoort in elke gemeente dwarsdeur ons land gewek te word, en daar moet onbaatsugtige optrede wees om in die behoeftes van die verskeie sendingvelde te voorsien. Mense moet van hulle belangstelling in die saak van God getuig deur van hulle middele by te dra. As so 'n belangstelling geopenbaar sou word, sou daar 'n band van Christelike broederskap wees en steeds sterker word onder al die lede van Christus se huisgesin.

Hierdie taak om al die tiendes getrou in te bring sodat daar spys in die huis van God kan wees, sou werkers vir velde tuis sowel as in die buiteland voorsien. Hoewel boeke en ander publikasies oor die teenswoordige waarheid hulle kleinode van kennis na alle dele van die wêreld versprei, moet daar nogtans sendingstasies op verskillende plekke aangebring word, Die lewende prediker moet die woorde van lewe en die saligheid verkondig. Daar is velde wat ooplê en werkers nooi om binne te kom. Die oes is ryp en die ernstige Macedoniese geroep om arbeiders klink uit alle dele van die wêreld op.—*R. & H.*, 19 Feb. 1889.

Die Werk Moet Nie tot Stilstand Kom Nie

As ons dan inderdaad die waarheid vir hierdie laaste dae het, moet dit na elke nasie en stam en taal en volk uitgedra word. Spoedig moet die lewende en die dode geoordeel word volgens wat hulle in die vlees gedoen het, en die wet van God is die standaard waaraan hulle getoets sal word. Dan moet hulle nou gewaarsku word; die heilige wet van God moet gehandhaaf en voor hulle soos 'n spieël gehou word. Om hierdie werk te kan doen, moet middele gevind word. Ek weet dat die tyd moeilik is en geld is skaars; maar die waarheid moet versprei word, en die geld om dit mee te versprei, moet in die skatkis gestort word.

SAL ONS DIE WERK IN DIE STEEK LAAT?

Ons het 'n wêreldwye boodskap; maar baie verrig letterlik niks nie; baie ander so uiters min, met so 'n groot gebrek aan geloof, dat dit so te sê niks is nie. Sal ons die veld wat ons reeds in vreemde lande geopen het, laat vaar? Sal ons deel van ons buurtsendingwerk uitskakel? Sal ons bleek

word oor die skuld van 'n paar duisend rand? Sal ons huiwerig word en nou maar net aanploeter hier in die slottonele van die wêreld se geskiedenis? My hart sê: Nee, nee. Ek kan nie oor hierdie aangeleentheid dink sonder 'n brandende ywer vir die werk om voort te gaan nie. Ons wil nie ons geloof verloën nie, ons wil Christus nie verloën nie, maar dit is wat sal gebeur as ons nie opruk soos die voorsienigheid van God die weg oopmaak nie.

Die werk moet nie weens gebrek aan middele tot stilstand kom nie. Meer middele moet daarin belê word. Broeders in Amerika, in die Naam van my Meester gebied ek u om te ontwaak. Aan u wat u talent van middele in 'n doek toedraai en in die aarde wegsteek, wat huise bou en die een eiendom by die ander voeg, sê God: "Verkoop wat jy het en gee aalmoese." Die tyd sal aanbreek wanneer diegene wat die gebooie bewaar, nie sal kan koop of verkoop nie. Maak gou en grawe u verborge talente uit. As God geld aan u toevertrou het, eer daardie pand; maak die doek los en stuur u talente na die bankiers, sodat wanneer Christus kom, Hy dit wat Hom toekom met rente kan ontvang.

BLYMOEDIGE VRYGEWIGHEID IN HIERDIE SLUITINGSTRYD

In die nood van die heel laaste dae, wanneer hierdie werk afsluit, sal duisende blymoedig op die altaar geplaas word. Manne en vroue sal dit as 'n geseënde voorreg beskou om 'n deel te hê aan die taak om siele voor te berei om in die groot dag van God staande te bly, en hulle sal honderde rand skenk so bereidwillig as wat hulle tans enkele rande gee.

Indien die liefde van God in die harte van Sy belydende volk sou brand, sou ons sien hoe dieselfde gees vandag geopenbaar word. As hulle maar net besef het hoe naby die einde is van alle werk om siele te red, sou hulle met dieselfde offervaardigheid as die lidmate van die vroeë kerk hulle besittings beskikbaar stel. Hulle sou met dieselfde ywer werk om die saak van God te bevorder as wat wêreldse mense in die verkryging van rykdom aan die dag lê. Takt en vaardigheid sou beoefen word, en daar sou ernstig en onbaatsugtig gewerk word om middele te bekom, nie om op te gaar nie, maar om in die skatkis van die Here te stort.

Wat maak dit saak of sommige arm word omdat hulle hul middele in die werk van die Here belê het? Om u ontwil het Christus arm geword; maar u is besig om vir uself ewige rykdom te verwerf, 'n skat in die hemel wat onuitputlik is. U middele is dáár baie veiliger as wanneer dit by 'n bank

gedeponeer word of in huise of grond belê is. Dit is weggebêre in sakke wat nie sal oud word nie. Geen dief kan dit bykom nie; geen vuur kan dit verteer nie. ...

Wanneer ons die opdrag van die Heiland uitvoer, sal ons voorbeeld harder as ons woorde spreek. Die mees verhewe openbaring van die krag van die waarheid word gesien wanneer diegene wat dit bely, hulle geloof in werke openbaar. Diegene wat hierdie plegtige waarheid glo, moet so 'n gees van selfopoffering hê dat dit die wêreldse ambisie van geldaanbidders sal beskaam.- *Historical Sketches of the Foreign Missions of the Seventh-day Adventists*, bl. 291-293.

HEELHARTIGE GETROUHEID AAN DIE KERK

Elke gelowige moet heelhartig aan die Kerk geheg wees. Die voorspoed daarvan moet sy allereerste belang wees, en tensy hy voel dat hy onder 'n heilige verpligting verkeer om sy lidmaatskap tot voordeel van die Kerk te laat geld, eerder as om aan homself die voorkeur te gee, sal dit baie beter daaraan toe wees om sonder hom klaar te kom. Almal kan iets tot die saak van God bydra. Daar is diegene wat groot bedrae aan onnodige weeldeartikels bestee; hulle voldoen aan hulle begeertes, maar om van hulle middele ter ondersteuning van die Kerk by te dra, is vir hulle 'n groot las. Hulle is bereid om alle kerklike voordele te benut, maar verkies om die vereffening van rekenings aan andere oor te laat. Diegene wat 'n diepgaande belang in die vooruitgang van die saak stel, sal nie huiwer om geld in hierdie omdememing te belê nie, wanneer en waar dit ook al nodig mag wees.-4T 18.

Diegene wat hulle in die kosbare lig van die waarheid verbly, sal 'n vurige begeerte koester om dit oral te laat verkondig. Daar is 'n paar getroue vaandeldraers wat nooit vir hulle plig terugdeins of hulle verantwoordelikhede ontwyk nie. Hulle harte en hul beursies is altyd oop vir elke oproep om middele om die saak van God te bevorder. In der waarheid is daar sommige wat skynbaar gereed is om meer as hulle plig na te kom, asof hulle vrees dat hulle die voorreg sal verbeur om hulle deel in die bank van die hemel te belê.

Daar is andere wat so min moontlik sal doen. Hulle hoop skatte op, of verkwis middele op hulleself. Teensinnig dra hulle 'n karige deeltjie by om die saak van God te bevorder. As hulle 'n gelofte aflê of iets aan God be-

lowe, is hulle later spyt daaroor en sal die vereffening so lank as moontlik vermy, indien dit nie op die lange baan geskuif word nie. Hulle verklein hulle tiende tot so min moontlik, asof hulle altyd bang is dat wat hulle aan God teruggee, verlore gaan. Dit kan gebeur dat ons verskeie inrigtings weens gebrek aan middele in verleentheid raak, maar hierdie soort mense tree op asof dit aan hulle geen verskil maak of dit daarmee goed gaan of nie. En tog is hierdie inrigtings Gods instrumente waardeur die wêreld verlig moet word."-4T 477, 478.

Die Doopgelofte

Elkeen wat hom by die Kerk aansluit, lê deur middel van daardie daad 'n plegtige eed af om in belang van die Kerk op te tree en om dit by hom bo enige wêreldse aangeleentheid te laat oorweeg. Dit is sy plig om 'n lewende verbintenis met God in stand te hou, om hart en siel by die groot verlossingsplan te betrek en om deur sy eie lewe en karakter die uitnemendheid van Gods gebooie te openbaar, in teenstelling met die gewoontes en voorskrifte van die wêreld. Elke siel wat Christus bely het, het hom daartoe verbind om alles te wees wat hy as geestelike werker kan wees, om aktief, ywerig en doeltreffend in sy Meester se diens te arbeid. Christus verwag dat elke mens sy plig sal nakom. Laat dit orals in die geledere van Sy navolgers die wagwoord wees.

As blyke van hulle getrouheid aan God behoort almal verstandige gebruik te maak van die kapitaal wat deur Hom aan hulle toevertrou is, nie net wat middele betref nie, maar met enige begaafdheid wat Sy koninkryk kan bevorder, Satan sal elke moontlike middel aanwend om te verhoed dat die waarheid diegene bereik wat in dwaling begrawe is; maar die stem wat waarsku en pleit moet tot hulle deuring. Alhoewel daar 'n paar met hierdie werk besig is, behoort daar duisende te wees wat net so veel soos hulle sal belangstel.-5T 460-462.

Ons Taak

Daar is 'n wêreld wat gewaarsku moet word. Hierdie werk is aan ons opgedra. Ons moet tot elke prys die waarheid uitleef. Ons moet gedurig in 'n stemming van gereedheid en selfopoffering verkeer, gewillig om, indien nodig, in die werk van God selfs ons lewe prys te gee. Daar is 'n groot werk om in 'n kort tydjie te verrig. Ons behoort ons werk te verstaan en dit getrou te doen. Elkeen wat uiteindelik as oorwinnaar gekroon word,

sal deur edele, vasberade pogings om God te dien, die reg verdien om met Christus se geregtigheid bekleed te word. Om tot die veldtog teen Satan toe te tree en die bloedbevleete banier van die kruis van Christus te dra - dit is die plig van elke Christen. Hierdie werk verg selfopoffering. Selfverloëning en die kruis kom orals op die lewenspad voor. "As iemand agter My aan wil kom, moet hy homself verloën en sy kruis opneem en My volg," het Christus gesê. Diegene wat die skatte van hierdie wêreld verkry, is onder die verpligting om te arbeid en op te offer. Sal diegene wat na 'n ewige beloning streef, meen dat hulle geen opoffering hoef te maak nie?—R. & H., 31 Jan. 1907.

Moenie vir Oproepe Wag Nie

Ons mense moet nie vir meer oproepe wag nie, maar hulle moet die werk reg aanpak en die skynbare onmoontlik maak. Laat elkeen homself afvra: Het die Here nie middele aan my toevertrou om Sy saak te bevorder nie?

Laat ons eerlik voor die Here wees. Al die seëninge wat ons geniet, kom van Hom af; en as Hy die talent van besittings aan ons toevertrou het, sodat ons Sy werk kan doen, sal ons nog aarsel? Sal ons sê: Nee, Here, my kinders sal nie tevrede wees nie, en daarom waag ek dit om aan God ongehoorsaam te wees en my talent in die grond te begrawe?

Daar moet geen oponthoud wees nie. Die saak van God vereis u ondersteuning. Ons versoek u as die Here se rentmeesters om Sy middele vry te stel om fasiliteite te voorsien waardeur baie die geleentheid sal kry om te leer wat waarheid is.

Die versoeking mag tot u kom om u geld in grond te belê. Miskien sal u vriende u aanraai om dit te doen. Maar is daar nie 'n beter manier om u middele te belê nie? Is u nie duur gekoop nie? Is u geld nie aan u toevertrou dat u daarmee vir Hom moet woeker nie? Kan u nie insien nie Hy verwag dat u, u middele moet gebruik om te help om kerkgeboue op te rig, om te help om sanatoriums te stig waar die siekes liggaamlike en geestelike genesing sal ontvang en om te help om skole tot stand te bring waar die jeug vir diens opgelei kan word, sodat werkers na alle dele van die wêreld gestuur kan word?

God self is die oorsprong van die planne om Sy werk te bevorder, en Hy het Sy volk van 'n oorvloed middele voorsien, sodat hulle blymoedig sal reageer wanneer Hy hulle om hulp vra. As hulle getrou sal wees om die

middele wat Hy aan hulle geleen het, na Sy skatkis te bring, sal Sy werk met rasse skrede vooruitgaan. Baie siele sal vir die waarheid gewerf word en die dag van Christus se wederkoms bespoedig word.—R. & H., 14 Julie 1904.

DIE STEM VAN TOEWYDING

Is dit die taal van u hart? "Ek is geheel en al U eiendom, my Heiland. U het die losprys vir my siel betaal en alles wat ek is en ooit verwag om te wees, behoort aan u. Help my om middele te bekom, nie om dit onverstandig te verkwis nie, nie om my in hoogmoed te verlustig nie, maar om daarmee U eie naam te verheerlik."

Laat u gedagte wees in alles wat u doen: "Is dit die weg van die Here? Sal dit my Verlosser behaag? Hy het Sy lewe vir my gegee; wat kan ek aan die Here terugbesorg? Al wat ek kan sê, is: ,Wat U eie is, Heer, gee ek gewillig aan U: "Tensy die naam van God op u voorhoofd geskrywe is – daar geskryf is omdat God die middelpunt van u gedagtes is – sal u nie vir die erfdeel in ligglans geskik wees nie. Dit is u Skepper wat vir u die ganse hemel in een wonderbare gawe uitgestort het – Sy eniggebore Seun.

God lê Sy hand op die tiende, sowel as op skenkings en offergawes, en sê: "Dit behoort aan My. Toe Ek My goed aan jou toevertrou het, het Ek gespesifiseer dat 'n deel joune sal wees, om in jou behoeftes te voorsien, en dat 'n deel aan My terugbesorg moet word."

Toe u die oes ingesamel het, die graanskure en pakhuis vir u eie gerief volgemaak het, het u getrou 'n tiende aan die Here gegee? Het u, u geskenke en offergawes na die Here gebring sodat Sy saak nie mank sal gaan nie? Het u na die weduwees en die wese omgesien? Hier is 'n afdeling van buurtsendingwerk wat onder geen omstandighede verwaarloos moet word nie.

Is daar nie om u armes en noodlydendes wat warmer klere, beter voedsel en, bowenal, – wat die hoogste op prys gestel sou word – medelyde en liefde nodig het nie? Wat het u vir die weduwees gedoen, die ellendiges, wat tot u roep om hulle te help om hul kinders of kleinkinders te leer en op te lei? Hoe het u op hulle gevalle gereageer? Het u probeer om die wese te help? Toe besorgde ouers of grootouers u met 'n beswaarde gemoed genader en versoek het, selfs by u gepleit het om hulle geval te oorweeg, het u hulle afgewys en op ongevoelige, onsimpatieke wyse hulle versoek

geweier? Indien wel, mag die Here Hom oor u toekoms ontferm; want “met die maat waarmee julle meet, sal weer vir julle gemeet word.” Is ons daaroor verbaas as die Here Sy seën weerhou wanneer Sy gawes op self-sugtige wyse misbruik word?

God skenk gedurig aan u die seëninge van hierdie lewe, en as Hy u vra om Sy gawes uit te deel deur die verskillende vertakings van Sy werk by te staan, is dit in u eie tydelike en geestelike belang om dit te doen en daardeur God as die Gewer van elke seëning te erken. God as Meesterwerker, werk saam met mense tot verkryging van die middele vir hulle onderhoud; en Hy verwag dat hulle in die redding van siele met Hom sal saamwerk. Hy het in die hande van Sy diensknegte die middele geplaas om die werk aan die tuisfront sowel as in die buiteland voort te sit. Maar as net die helfte van die mense hulle plig nakom, sal die skatkis nie van die nodige middele voorsien word nie en baie dele van Gods werk moet onafgehandel bly. –*R. & H.*, 23 Des. 1890.

’n Antwoord op Christus se Gebed om Eenheid

Die Kerk sal nooit die plek bereik wat God verlang dit moet bereik voordat dit ’n band van meegevoel met sendingwerkers gesmee het nie. Nooit kan die eenheid waarom Christus gebid het, bestaan voordat geestelikheid in sendingwerk uiting vind en die Kerk ’n middel word om sendingwerk te ondersteun nie. Die pogings van die sendelinge sal nie hulle oogmerke bereik nie voordat gemeentelede aan die tuisfront bewys lewer, nie net in woord nie, maar ook in daad, dat hulle die verpligting besef wat op hulle rus om hierdie sendelinge hulle hartelike steun te verleen.

God vra om werkers. Persoonlike optrede is nodig. Maar bekering moet eerste kom; om die redding van ander na te streef, volg hierop. –*R. & H.*, 10 Sept. 1903.

Ontledig die Hart van Selfsug

Dit is betreurenswaardig dat die Kerk vandag so traag is om aan die Here dank te betuig vir verryking deur Sy genade, omdat Hy aan die Kerk Sy talente van middele geskenk het, sodat daar in die behoeftes van Sy skathuis voorsien kan word.

Die dor gedeeltes van die Here se wingerd roep uit tot God: “Die mense het my verwaarloos.” Deur toe te laat dat hulle medemens in die bande van gebrek en ontaarding verstriek bly, stel manne en vroue Satan in die

geleentheid om God daarvan te beskuldig dat Hy Sy kinders weens ’n gebrek aan lewensmiddele laat ly. God word beledig deur die onverskilligheid van diegene aan wie Hy Sy middele toevertrou het. Sy rentmeesters sluit hulle oë vir die ellende wat hulle kon verhelp het. Op dié manier steek hulle die Naam van God in die skande.

Niemand moet met sy verantwoordelikhede speel nie.

As dit by u nie om rande gaan nie, maar net sente, onthou dat die seën van God onvermoeide ywer bekroon. Hy verag nie die dag van klein begin nie. Die verstandige gebruik van die min wat daar is, sal ’n wonderlike vermeerdering bewerkstellig. Een talent wat verstandig gebruik word, sal twee aan die Here besorg. Rente word verwag in verhouding tot die toevertroude kapitaal. God neem van die mens aan volgens wat hy besit en nie volgens wat hy nie besit nie.

God verwag wat u Hom skuld in tiendes en offergawes.

Hy verlang toewyding in elke vertakking van Sy werk. Kom u plig getrou na op u aangewese plek. Werk met erns en onthou dat Christus aan u sy staan, besig om vir u te beplan, te beraam en te bou. “En God het mag om alle genade oorvloedig oor julle te laat wees sodat julle altyd in alle opsigte volop kan hê en oorvloedig kan wees tot elke goeie werk.” Gee blymoedig, gewillig, dankbaar dat u iets kan bydra om Gods koninkryk in die wêreld te bevorder. Ontledig die hart van selfsug en span die verstand in om Christelike werk te verrig. As u in noue verbintenis met God verkeer, sal u bereid wees om enige opoffering te maak om die ewige lewe binne die bereik te bring van diegene wat verlore gaan.

GEESTELIKE VOORSPOED EN CHRISTELIKE VRYGEWIGHEID

In die Naam van die Here, smee ek my broeders en susters om in hierdie krisisuur van ons werk die Here te kom help, om die Here teen die magtige te help. Om van die Here terug te hou, gaan altyd met ’n vloek gepaard. Geestelike voorspoed hou ten nouste verband met Christelike vrygewigheid. Die enigste verheffing waarna u moet smag, is om die Goddelike vrygewigheid van die Verlosser na te volg. U het die kosbare versekering dat u skat u na die hemelse wonings vooruitgaan.

Wil u seker maak dat u eiendom veilig is? Plaas dit in die hand wat die wondmerke van die kruisiging dra. Weerhou alles in u besit en dit sal vir u ewige verlies beteken. Gee dit aan God, en van daardie oomblik af dra dit

Sy stempel. Dit is met Sy onveranderlikheid verseël. Wil u die genot van u besittings smaak? Gebruik dit dan om die noodlydendes te seën. Wil u nog meer besit? "Vereer die Here uit jou goed en uit die eersteling van jou inkomste; dan sal jou skure vol word van oorvloed en jou parskuipe oorloop van mos."

GOD SAL DIE HAND WEER VUL

As almal hulle deel bydra, sal die kaalheid van die Here se wingerd nie meer 'n veroordeling wees vir diegene wat voorgee om Christus te volg nie. Mediese sendingwerk moet die deur oopstel vir die verkondiging van die teenswoordige waarheid. Die derde engel se boodskap moet in alle oorde opklink. Spaar! Raak ontslae van u hoogmoed. Gee u aardse skatte aan God. Gee nou wat u kan, en namate u met Christus saamwerk, sal u hand oopgaan om nog meer te skenk. En God sal weer u hand vul sodat die skat van die waarheid na baie siele geneem kan word. Hy sal aan u gee om aan ander te gee. –R. & H., 10 Des. 1901.

'n OPROEP TOT GROTER ERNS

Die wêreld en die kerke oortree die wet van God, en hierdie waarskuwing moet aan hulle gerig word: "As iemand die dier en sy beeld aanbid en 'n merk op sy voorhoof of op sy hand ontvang, sal hy self ook drink van die wyn van die grimmigheid van God wat ongemeng ingeskink is in die beker van sy toom." Moet ons, met so 'n vloek wat die verbrekers van Gods heilige Sabbat bedreig, nie groter erns en ywer aan die dag lê nie? Hoekom is ons so onverskillig, so selfsugtig, so verdiep in tydelike sake? Is ons belange geskei van die van Jesus? Het die waarheid te reguit, te ongemaklik, vir ons siele geword; en het ons, net soos die gekrenkte discipels van Jesus, weggedraai na die goedkoop dinge van die wêreld? Ons spandeer geld vir selfsugtige doeleindes, en bevredig ons eie begeertes, terwyl siele sonder 'n kennis van Jesus of die waarheid sterf. Hoe lank sal dit nog voortgaan?

Almal behoort 'n lewende geloof te hê – 'n geloof wat deur liefde werk en die siel reinig. Manne en vroue is bereid om enigiets te doen wat die eie ek tevrede stel, maar hoe min is hulle gewillig om te doen vir Jesus en hul medemens, wat weens gebrek aan die waarheid verlore gaan!

BELÊ NOU IN DIE BANK VAN DIE HEMEL

Het die tyd nie aangebreek om ons besittings te begin verminder nie? Mag God u help, terwyl u nog kan om 'n belegging in die hemelse bank te maak. Ons vra nie om 'n lening nie, maar 'n vrywillige offergawe – 'n terugbesorging aan die Meester van Sy eie besittings wat Hy aan u geleen het. Indien u God bo alles, en u naaste soos uself, lief het, glo ons dat u tasbare bewys daarvan sal lewer deur u offergawes vir ons sendingwerk. Daar is siele wat gered moet word, en mag u medewerkers van Jesus Christus wees tot redding van diegene vir wie Christus Sy lewe gegee het. Die Here sal u seën in die goeie vrugte wat u tot Sy eer kan voortbring. Mag dieselfde Heilige Gees wat die skrywe van die Bybel geïnspireer het, van u harte besit neem, en u leer om Sy woord lief te hê, want dit is gees en lewe. Mag dit u oë open om die dinge van die Gees van God te ontdek. Die rede waarom daar vandag soveel verpotte godsdiens is, is omdat mense nie praktiese selfverloëning en selfopoffering in hulle lewens openbaar nie. –R. & H., 8 Jan. 1889.

Laat Reën Uitgestel

Die groot uitstorting van die Gees van God, wat die hele aarde met Sy heerlikheid vul, sal nie plaasvind voordat ons 'n verligte volk het wat deur ondervinding weet wat dit beteken om medewerkers van God te wees nie. Sodra ons volkome en heelhartig toegewy is aan die diens van Christus, sal God hierdie feit erken deur die uitstorting van Sy Gees sonder mate, maar dit sal nie gebeur terwyl die grootste gedeelte van die Kerk nie medewerkers van God is nie. God kan nie Sy Gees uitstort wanneer selfsug en selfvertroeteling so hoogty vier nie; wanneer 'n gees heers wat, as dit in woorde uitgedruk word, Kain se antwoord sou weergee: "Is ek my broer se wagter?" –R. & H., 21 Julie 1896.

Maak Elke Aardse Belang Ondergeskik

My liewe Broeders en Susters, ek spreek my woorde tot u in teerheid en liefde. Elke aardse belang moet ondergeskik gemaak word aan die Groot verlossingswerk.

Onthou dat daar in die lewens van Christus se volgeling dieselfde toewyding, dieselfde onderwerping van elke sosiale belang en elke aardse gesindheid aan Gods werk gesien moet word as wat in Sy lewe geopenbaar is. Die aansprake van God moet altyd die eerste plek geniet. "Wie va-

der of moeder bo My liefhet, is My nie waardig nie." Christus se lewe is ons lesboek. Sy voorbeeld moet ons besiel om onvermoeide, selfopofferende pogings tot voor-deel van andere aan te wend. ...

Elke vermoë van Gods dienaars moet voortdurend beoefen word om baie seuns en dogters na God te bring. In Sy diens moet daar geen onverskilligheid, geen selfsug wees nie. Enige selfvertroetelende afwyking van selfverloëning, enige verslapping van ernstige smeekbede om die Heilige Gees se werking, beteken dat net soveel krag aan die vyand verleen word. Christus neem Sy Kerk in oënskou. Hoeveel is daar nie wie se godsdienstige lewe op hulle eie oordeel neerkom nie!

God eis wat ons nie gee nie: onvoorwaardelike toewyding. As elke Christen getrou was aan die gelofte wat hy gedoen het toe hy Christus aangeneem het, sou daar nie soveel mense in die wêreld verwaarloos gewees het om in sonde verlore te gaan nie. Wie sal verantwoording moet doen vir die siele wat in die graf neergedaal het, onvoorbereid om hulle Here te ontmoet? Christus het Homself as algenoegsame offer vir ons gebring. Hoe ernstig het Hy nie gewerk om sondaars te red nie. Hoe onvermoeid was Sy pogings om Sy dissipels vir diens voor te berei! Maar hoe min het ons gedoen! En die invloed van die bietjie wat ons wel gedoen het, is ontsettend verswak deur die neutraliserende uitwerking van wat ons ongedaan gelaat, of ondemeem en nooit voltooi het nie, en deur ons gewoontes van lustelose onverskilligheid. Hoeveel het ons nie verloor deur te versuim om vooruit te beur om ons Godgegewe werk te volbring nie! As belydende Christene behoort ons uiters ontsteld te wees oor dié toedrag van sake.—R. & H., 30 Des. 1902.

Die Gees van Opoffering

Die saligheidsplan is gegrond op 'n opoffering so wyd en diep en hoog dat dit onmeetbaar is. Christus het nie Sy engele na hierdie gevalle wêreld gestuur terwyl Hy in die hemel gebly het nie, maar Hy het self tot buitekant die laer gegaan en die smaad verduur. Hy het 'n man van smarte geword, en bekend met krankheid; Hy het self ons krankhede op Hom geneem, en óns smarte—dié het Hy gedra. En God beskou die afwesigheid van selfverloëning in Sy belydende volgeling as 'n verloëning van die benaming Christen. Diegene wat voorgee om een met Christus te wees, en hulle selfsugtige begeertes vir ryk en duur klere, huisraad en kos botvier, is net naamchristene. Om 'n Christen te wees, is om Christus se karakter te

openbaar.

En tog hoe waar is die woorde van die apostel nie:

"Want hulle soek almal hul eie belange, nie dié van Christus Jesus nie." Baie Christene lewer geen werke ooreenkomstig die naam wat hulle dra nie. Hulle tree op asof hulle nooit gehoor het van die verlossingsplan wat teen 'n oneindige prys bewerkstellig is nie. Die meeste se doelwit is om vir hulleself 'n naam in die wêreld te verwerf; hulle neem sy vorme en gebruike oor, en leef om die eie ek te vertroetel. Hulle jaag hulle eie planne net so gretig na soos die wêreld self, en sodoende sny hulle hul krag af wat kon gehelp het met die vestiging van Gods koninkryk.

Die werk van God, wat met tien keer sy huidige stukrag en doeltreffendheid behoort te vorder, word teruggehou, soos 'n lente wat deur die kil winterwind vertraag word, omdat sommige van Gods belydende volk vir hulleself die middele toe-eien wat aan Sy diens gewy behoort te word. Omdat Christus se selfopofferende liefde nie met die lewensgewoontes vervleg is nie, is die Kerk swak waar hy sterk behoort te wees. Deur sy eie toedoen het hy sy lig geblus, en miljoene van die evangelie van Christus beroof. ...

'n TOETS VAN GETROUHEID

"VEREER die Here uit jou goed en uit die eersteling van al jou inkomste; dan sal jou skure vol word van oorvloed en jou parskuipe oorloop van mos."

Hierdie teksverse leer ons dat God, as Gewer van alle dinge wat ons ontvang, 'n reg op elkeen daarvan het; dat Sy aansprake ons eerste oorweging behoort te wees; ook dat 'n spesiale seën uitgestort sal word op diegene wat hierdie eis nakom.

Hier word 'n beginsel uiteengesit wat uit al Gods handeling met die mens blyk. Die Here het ons oerouers in die tuin van Eden geplaas. Hy het hulle omring van alles wat tot hul geluk kon bydra, en hulle beveel om Hom as die Eienaar van alle dinge te erken. In die tuin het Hy allerhande bome laat uitspruit, begeerlik om te sien en goed om van te eet; maar Hy het een uitsondering gemaak. Van alles kon Adam en Eva vrylik eet, maar van daardie een boom het God gesê: "Daarvan mag jy nie eet nie." Hier was die toets van hulle dankbaarheid en lojaliteit teenoor God.

So het God aan ons die hemel se kosbaarste skat gegee toe Hy Jesus

aan ons geskenk het. Saam met Hom is alle dinge aan ons gegee om ryklik te geniet. Die opbrengste van die aarde, die oorstroomende oester, die skatte van goud en silwer is Sy gawes. Huise en grond, kos en klere het Hy in die besit van die mens geplaas. Hy vra ons om Hom as die Gewer van alle dinge te erken; daarom sê Hy: Van al julle besittings het ek 'n tiende vir Myself uitgehou, behalwe skenkings en offergawes, wat na My skathuis gebring moet word. God het hierdie voorsiening gemaak vir die vooruitgang van die evangeliewerk.

Dit is die Here Jesus Christus Self wat Sy lewe vir die lewe van die wêreld gegee het, wat hierdie plan van stelselmatige offergawes ingestel het. Hy wat die koninklike hof verlaat het, wat Sy eer as Bevelvoerder van die hemelse leërskare tersyde gestel het, wat Sy godheid met menslikheid beklee het om die gevalle ras te verhef; Hy wat om ons ontwil arm geword het dat ons deur Sy armoede ryk kan word, het tot die mens gespreek, en in Sy wysheid hulle Sy eie plan meegedeel vir die onderhoud van diegene wat Sy boodskap na die wêreld moet neem. –R. & H., 4 Feb. 1902.

Gods Reserwes van Tyd en Besittings

Dieselfde taal wat gebruik word om die Sabbat te beskryf, word ook in verband met die tiendewet gebesig:

“Die sewende dag is die Sabbat van die Here jou God.” Die mens het nie die mag of die reg om die eerste dag in die plek van die sewende te stel nie. Hy mag voorgee om dit te doen, maar “die fondament van God staan vas.” Die gewoontes en leringe van mense sal geensins die eise van die Goddelike wet verminder nie. God het die sewende dag geheilig. Daardie spesifieke tydsdeel, deur God self vir aanbidding afgesonder, is vandag nog net so heilig soos toe ons Skepper die Sabbat ingestel het.

Op dieselfde wyse is 'n tiende van ons inkomste “heiligh aan die Here.” Die Nuwe Testament herhaal nie die tiendewet, soos ook nie die Sabbatsgebod nie; die geldigheid van albei word as vanselfsprekend aanvaar, en hul diep geestelike betekenis verduidelik. ... Terwyl ons as volk Daarna streef om God getrou die tyd te gee wat Hy as Sy eie afgesonder het, sal ons nie ook aan Hom daardie gedeelte van ons inkomste skenk wat Hy as Syne eis nie? –R. & H., 16 Mei 1882.

Betaal Tiende op Besittings Sowel as Inkomste

Soos Abraham moet ons ook 'n tiende betaal op alles wat ons besit

en ontvang. 'n Getroue tiende is die Here se deel. Om dit te weerhou, is om God te beroof. Elke mens behoort vrywillig en met vreugde die tiendes en offergawes na die Here se skatkamer te bring, want dan sal hy 'n seën ontvang. Dit is nie veilig om van God Sy eie deel terug te hou nie. –MS 159, 1899.

Vir Elke Bedeling

Dit [met verwysing na die gewoonte van Abraham en Jakob om tiendes te betaal] was die algemene gebruik van patriarge en profete voordat die Jode as nasie tot stand gekom het. Maar toe Israel 'n aparte volk geword het, het die Here hulle 'n besliste opdrag in hierdie verband gegee: “Al die tiendes van die land, van die graan van die land, van die vrugte van die bome, behoort aan die Here; dit is heilig aan die Here.” Hierdie wet sou nie verbygaan saam met die verordeninge en offerandes wat Christus versinnebeeld het nie. So lank God 'n volk op aarde het, sal Sy aansprake op hulle dieselfde bly.

'n Tiende van al ons opbrengs behoort aan die Here.

Hy het dit vir Homself voorbehou, om vir godsdienstige doeleindes gebruik te word. Dit is heilig. Niks minder word in enige bedeling deur Hom aangeneem nie. 'n Verwaarlosing of uitstel van hierdie plig sal Goddelike misnoeë uitlok. As alle voorgewende Christene getrou hul tiendes na God bring, sal Sy skatkis vol wees. –R. & H., 16 Mei 1882.

Beplan as 'n Groot Seëning

Die spesiale tiendestelsel is gebaseer op 'n beginsel wat net so blywend is soos die wet van God. Hierdie stelsel het die Jode tot seën gestrek; anders sou God dit nie aan hulle gegee het nie. So sal dit tot aan die einde van die tyd 'n seën wees vir diegene wat dit toepas. Ons hemelse Vader het nie die plan van stelselmatige offergawes tot stand gebring om Homself te verryk nie, maar om die mens tot groot seën te strek. Hy het gesien dat die mens hierdie stelsel van milddadigheid nodig het. –3T 404, 405.

Nege-tiendes Meer Word as die Tien

Baie het die Israeliete se lot bejammer omdat hulle verplig is om stelselmatig te gee, afgesien van hulle ruimhartige jaarlikse offergawes. 'n Alwyse God het geweet watter stelsel van vrygewigheid die beste by Sy voorsienigheid sou pas en het Sy volk daaromtrent opdragte gegee. Dit is nog altyd bewys dat nege-tiendes meer werd is as tien-tiendes. –3T 546.

'n Merkbare Verandering Sedert die Dae van die Jode

Van al ons inkomste behoort Gods deel eerste uitbetaal te word. In die stelsel van vrygewigheid wat die Jode moes volg, is daar van hulle verwag om die eersteling van al Gods gawes na Hom te bring, of dit nou van die aanwas van hul skape of beeste was, of van die opbrengs van die land, die boord of wingerd; of andersins kon hulle dit loskoop met 'n gawe van gelyke waarde. Hoe anders staan sake in ons dae! Gods vereistes en aansprake moet, indien hulle nog enigsins aandag ontvang, tot heel laaste wag. Nogtans het ons werk nou tien maal meer geld nodig as in die Jode se tyd.

Die groot opdrag aan die apostels was om die hele wêreld in te gaan en die evangelie te verkondig. Dit toon die omvang van die werk en die groter verantwoordelikhede wat in ons tyd op die volgeling van Christus rus. As die wet duisende jare gelede tiendes en offergawes vereis het, hoe onontbeerlik is dit nie nou nie! As die rykes en die armes in die Joodse stelsel proporsioneel moes bydra, is dit nou dubbel nodig. -4T 474.

OP EWIGE BEGINSELS GEGRONDVES

Die tiendestelsel reik terug tot voor die dae van Moses. Van mense so ver in die verlede as die tyd van Adam is daar verwag om vir godsdienstige doeleindes gawes aan God te gee voordat die definitiewe stelsel aan Moses opgedra is. Deur aan Gods vereistes te voldoen, het hulle deur hul offergawes waardering getoon vir Sy genade en seëninge teenoor hulle. Hierdie gebruik is deur die daaropvolgende geslagte voortgesit ook deur Abraham, wat sy tiende aan Melgisedek, die priester van die Allerhoogste God, gegee het.

Hierdie beginsel het ook in die dae van Job bestaan. By Bet-el het Jakob, 'n banneling en brandarm, alleen in die nag gaan lê, met 'n klip as kussing, en aan God belowe:

"Van alles wat U my gee, sal ek aan U sekerlik die tiendes afstaan." God dwing mense nie om te gee nie. Alles wat hulle gee, moet vrywillig wees. Hy wil nie Sy skatkis met onwillige offergawes volmaak nie. -3T 393.

Paulus Het die Stelsel Erken

In sy eerste brief aan die kerk te Korinthe het Paulus die gelowiges onderrig oor die algemene beginsels wat die onderhoud van Gods werk

op aarde ten grondslag lê. Hy skryf oor sy apostoliese arbeid onder hulle en vra: "Wie dien ooit as soldaat op eie koste? Wie plant 'n wingerd en eet nie van sy vrug nie? Of wie pas 'n kudde op en geniet nie van die melk van die kudde nie? Sê ek dit miskien menslikerwys, of sê die wet dit nie ook nie? Want in die wet van Moses is geskrywe: 'n Os wat graan dors, mag jy nie muilband nie. Is dit miskien oor die osse dat God bekommer? Of spreek Hy inderdaad om ons ontwil? Ja, want om ons ontwil is dit geskrywe, omdat hy wat ploeg, op hoop moet ploeg; en hy wat dors, op hoop om wat hy hoop, deelagtig te word.

"As ons vir julle die geestelike gesaai het," vra die apostel verder, "is dit 'n groot saak as ons julle stoflike goed maai? As ander deel het aan die reg op julle diens, het ons nie nog meer nie? Ons het ewenwel nie gebruik gemaak van hierdie reg nie, maar ons verdra alles om geen hindemis vir die evangelie van Christus te veroorsaak nie. Weet julle nie dat die wat met die heilige dinge werk, uit die heiligdom eet nie; en dat die wat by die altaar besig is, met die altaar deel nie? So het die Here ook vir die wat die evangelie verkondig, bepaal dat hulle van die evangelie moet lewe." 1 Kor. 9:7-14.

Die apostel het hier verwys na die Here se plan vir die onderhoud van die priesters wat in die tempel diens gedoen het. Diegene wat vir hierdie heilige werk afgesonder is, is onderhou deur hul broeders aan wie hulle geestelike seëninge besorg het. "Nou het hulle wat uit die seuns van Levi die priesterskap ontvang, wel 'n gebod om, volgens die wet, van die volk tiendes te neem." Heb. 7:5. Die stam van Levi is deur God gekies om die heilige pligte van die tempel en die priesterskap te vervul. Oor die priester is daar gesê: "Want die Here jou God het hom uit al jou stamme uitverkies. ...om te dien in die Naam van die Here." Deut. 18:5. God het een tiende van alle vermeerdering as Sy eie geëis...

Dit was na hierdie plan vir die onderhoud van die evangeliedienaars wat Paulus verwys het toe hy gesê het: "So het die Here ook vir die wat die evangelie verkondig, bepaal dat hulle van die evangelie moet lewe." Later, toe hy aan Timotheüs geskryf het, het hy gesê: "Die arbeider is sy loon werd." 1 Tim. 5:18. -AA 335, 336.

Gods Aanspraak op Ons

God maak aanspraak op ons en alles wat ons het. Sy aanspraak geniet die voorrang bo alles. In erkenning van hierdie aanspraak beveel Hy ons

om 'n bepaalde gedeelte van alles wat Hy ons gee, aan Hom terug te besorg. Die tiende is hierdie vasgestelde deel. In opdrag van God is dit sedert die vroegste tyd geheilig. ...

Toe God Israel uit Egipte verlos het om Sy besondere eiendomsvolk te wees, het Hy hulle geleer om 'n tiende van hul besittings vir die tabemakelidiens af te staan. Dit was 'n spesiale offergawe, vir 'n spesiale werk. Die res van hul eiendom het ook aan God behoort en is tot Sy verheerliking gebruik. Die tiende is egter opsy gesit vir die onderhoud van diegene wat in die heiligdom diens gedoen het. Dit is gegee uit die eersteling van al hulle winste, en saam met geskenke en offergawes het dit mildelik voorsiening gemaak vir die onderhoud van die evangeliedienaars van daardie tyd.

God verwag niks minder van ons as van Sy destydse volk nie. Sy gawes aan ons is nie minder nie, maar meer, as wat Israel van ouds ontvang het. Sy diens het middele nodig, en dit sal altyd so wees. Die groot sendingwerk vir die redding van siele moet vooruitgaan. In die tiende, saam met geskenke en offergawes, het God vir dié werk oorvloedig voorsiening gemaak. Sy plan is dat die evangeliewerk ten volle onderhou sal word. Hy eis die tiende as Sy eie, en dit moet altyd as 'n heilige reserwe beskou word en in die skatkis gestort word tot voordeel van Sy saak, die vooruitgang van die werk, om sendelinge na verre streke tot aan die uiterste van die aarde, te stuur.

God het Sy hand op alle dinge gelê, op die mens sowel as sy besittings, want alles behoort aan Hom. Hy sê: Ek is die Eienaar van die wêreld; die heelal is Myne, en ek vereis dit van jou om aan My die eersteling te heilig van alles wat Ek, deur My seëninge, in jou hand gegee het. Gods Woord verklaar: "Die offer uit jou volle opbrengs... mag jy nié terughou nie." "Ver-eer die Here uit jou goed en uit die eersteling van al jou inkomste." Hierdie huldeblyk vereis Hy as bewys van ons lojaliteit teenoor Hom.

Ons behoort aan God; ons is Sy seuns en dogters; Syne deur skepping en ook deur die gawe van Sy eniggebore Seun vir ons saligheid. "... weet julle nie dat... julle nie aan juiself behoort nie? Want julle is duur gekoop. Verheerlik God dan in julle liggaam en in julle gees wat aan God behoort." Die verstand, die hart, die wil, die liefde behoort aan God; die geld wat ons hanteer, is die Here s'n. Elke goeie ding wat ons ontvang en geniet, is die gevolg van Goddelike milddadigheid. God is die oorvloedige gewer van alles wat goed is, en Hy verlang dat die ontvanger erkentlik sal wees vir die

gawes wat in elke behoefte van liggaam en gees voorsien is. God vereis net Sy eie. Die primêre deel behoort aan die Here, en moet as Sy toevertroude kleinood gebruik word. Die hart wat van selfsug ontledig is, sal wakker en bewus wees van Gods goedheid en liefde en daartoe beweeg word om heelhartig sy Goddelike vereistes na te kom. –R. & H., 8 Des. 1896.

'n PLAN PRAGTIG IN SY EENVOUD

Gods plan van tiendebetaling is pragtig in sy eenvoud en regverdigheid. Almal kan dit in geloofsvertroue en met moed aanneem, want sy oorsprong is Goddelik. Eenvoud en bruikbaarheid is hierin saamgevat en dit vereis geen hoë geleerdheid om te verstaan of uit te voer nie. Almal kan voel dat hulle 'n deel bydra tot die vooruitgang van die kosbare werk van sielervedding. Elke man, vrou of jongmens mag 'n tesourier van God word en help om voorsiening te maak vir die eise wat aan Sy skatkis gestel word. ...

Groot dinge word deur hierdie stelsel vermag.

As almal dit sou aanneem, sou elkeen 'n waaksame en getroue rentmeester vir God wees; daar sou geen gebrek aan middele wees vir die groot werk om die laaste waarskuwingsboodskap oor die aarde te laat weerklink nie. As almal hierdie stelsel aanneem, sal die skatkis vol en die bydraers niks armer wees nie. Deur elke belegging sal hulle meer volkome aan die saak van die teenswoordige waarheid geheg raak. Hulle sal dan "n goeie fondament vir die toekoms" lê "sodat hulle die ewige lewe kan verwerf." –3T 388, 389.

Vir Ryk en Arm

Volgens die Bybelstelsel van tiendes en offergawes sal die bedrae wat deur verskillende persone betaal word, natuurlik baie verskil, aangesien dit met inkomste verband hou. Vir die arm man sal die tiende betreklik min wees, en sy gawes ooreenkomstig sy vermoë. Maar dit is nie die grootte van die gawe wat dit vir God aanneemlik maak nie; dit is die motiewe van die hart, die gees van dankbaarheid en liefde wat daardeur uitgedruk word. Laat die armes nie voel dat hulle gawe te klein is om opgemerk te word nie. Laat hulle gee volgens hul vermoë, met die gevoel dat hulle diensknegte van God is, en Hy sal hulle offergawe aanneem.

As die persoon aan wie God 'n groot kapitaal toevertrou het, God liefhet en vrees, sal dit vir hom geen las wees om ooreenkomstig die vereistes

van God die aanspraak van 'n verligte gewete na te kom nie. Die rykes sal versoek word om selfsug en eiebaat bot te vier en van God Sy eie terug te hou. Maar hy wat getrou aan God is, sal antwoord, wanneer Satan hom versoek: "Daar is geskrywe," "Mag 'n mens God beroof?" "Want wat baat dit 'n mens as hy die hele wêreld win, maar aan sy siel skade ly? Of wat sal 'n mens gee as losprys vir sy siel?" –R. & H., 16 Mei 1893.

Met 'n Verbondsverhouding Verbind

In die groot werk om die wêreld te waarsku, sal diegene wat die waarheid in hulle harte het en daardeur geheilig is, hulle aangewese deel bydra. Hulle sal getrou wees met die betaling van tiendes en offergawes. Elke kerklid is deur 'n verbondsverhouding verbind met God om van elke uitspattige besteding van geld af te sien. Laat die gebrek aan spaarsin in die huis ons nie daarvoor ongeskik maak om ons deel te doen om die reeds gevestigde werk te versterk en nuwe terrein te betree nie. –R. & H., 17 Jan. 1907.

Ek pleit met my broeders en susters oor die ganse aarde om tot die verantwoordelikheid te ontwaak wat op hulle rus om getrou die tiende te betaal. ... Hou getrou boek met u Skepper. Besef terdeë die belangrikheid daarvan om eerlik te wees met Hom wat Goddelike voorkennis het. Laat elkeen sy hart ywerig ondersoek. Laat hom sy rekening nagaan en uitvind hoedanig sy verhouding tot God is.

Hy wat Sy eniggebore Seun gegee het om vir u te sterf, het 'n verbond met u gesluit. Hy gee u Sy seëninge en in ruil daarvoor verwag Hy tiendes en offergawes van u. Niemand sal ooit durf sê dat daar geen manier vir hom was waarop hy die saak kon verstaan nie. Gods plan met tiendes en offergawes word onomwonde in die derde hoofstuk van Maleági verklaar. God verwag getrouheid van Sy menslike rentmeesters aan die kontrak wat Hy met hulle aangegaan het. "Bring die hele tiende na die skathuis, sodat daar spys in my huis kan wees." –R. & H., 3 Des. 1901.

Nie 'n Strawwe Wet Nie

Sommige sal hierdie as een van die strawwe wette bestempel wat bindend op die Jode was. Maar dit was nie 'n las vir die gewillige hart wat God liefgehad het nie. Dit was slegs wanneer hulle selfsugtige natuur deur weerhouding versterk is dat mense ewige oorwegings uit die gesig verloor en hul aardse skatte meer as siele liefgehad het. –3T 396.

Geen Las Nie, Behalwe vir die Ongehoorsame

Die Skrif verwag van Christene om 'n plan van aktiewe weldadigheid te volg, wat 'n voortdurende belang in die redding van hul medemens aan die gang sal hou. Die sedewet vereis die onderhouding van die Sabbat, wat nie 'n las was nie, behalwe toe die wet oortree is en hulle moes ly onder die straf wat op die verbreking daarvan gevolg het. Die tiendestelsel was ook geen las vir diegene wat nie van die plan afgewyk het nie. Die stelsel wat die Hebreërs beveel is om na te kom, is nie afgeskaf of verslap deur die Een wat dit tot stand gebring het nie. In stede daarvan dat dit nou nie van toepassing is nie, moes dit meer volkome uitgevoer en verbrei word, omdat verlossing deur Christus alleen in die Christelike tydperk meer ten volle aan die lig gebring moet word. –3T 391, 392.

'n Skamele Bietjie

Ek praat van die tiendestelsel; maar hoe skamel lyk dit nie in my oë nie! Hoe klein die berekening! Hoe vergeefs om tyd, geld en liefde met matematiese reëls te meet teen 'n liefde en opoffering wat mateloos en onberekkenbaar is! Tiendes vir Christus! o, skamele, skandelijke vergelding vir wat so baie gekos het! –4T 119.

'n Praktiese Aangeleentheid

Die gedagte aan rentmeesterskap moet 'n praktiese uitwerking op al die kinders van God maak. Praktiese milddadigheid sal geestelike lewe verleen aan duisende naam - christene wat die waarheid bely maar nou oor hul duisternis treur. Dit sal hulle verander van selfsugtige, hebsugtige mammon aanbidders tot ernstige, getroue medewerkers saam met Christus om sondaars te red. –3T 387.

"God het 'n plan beraam waardeur almal kan gee namate Hy hulle geseën het, 'n plan wat dit 'n gewoonte sal maak om te gee sonder om op 'n spesiale oproep te wag. Diegene wat dit kan doen, maar weens hulle selfsug weier, beroof hulle Skepper wat aan hulle middele geskenk het sodat hulle dit in Sy saak kan belê om Sy belange te bevorder. Tot tyd en wyl almal die plan van stelselmatige weldadigheid uitvoer, sal die reël van die apostels nie nagekom word nie." –3T 411.

GEREELD EN STELSELMATIG

Die opdragte wat die Heilige Gees deur die apostel Paulus in verband met gawes gegee het, stel 'n beginsel voor wat ook op tiendebetaling betrekking het: "Op elke eerste dag van die week moet elkeen van julle self opsy sit en opspaar namate sy voorspoed is." Ouers en kinders word hier ingesluit. Nie net die rykes nie, maar ook die armes, word aangespreek. "Laat elkeen gee soos hy hom in sy hart voomeem, [deur Gods voorgeskrewe plan eerlik te oorweeg] nie met droefheid of uit dwang nie, want God het 'n blymoedige gewer lief." Die gawes moet gegee word ter wille van die groot goedheid van God jeens ons.

Watter tyd sou geskikter wees vir die opsy sit van tiendes en die aanbidding van offergawes aan God? Op die Sabbat het ons aan Sy goedheid gedink. Ons het Sy handewerk in die skepping aanskou as 'n bewys van Sy krag tot saligheid. Ons harte is gevul met dankbaarheid vir Sy groot liefde. En nou, voor die werksaamhede van die week begin, gee ons aan Hom Sy eie asook 'n offergawe om ons dank te betuig. Hierdie gewoonte sal 'n weeklikse preek wees, wat verklaar dat God die besitter van al ons eien-dom is en dat Hy ons rentmeesters gemaak het om dit tot Sy heerlijkheid te gebruik. Elke erkenning van ons verpligting teenoor God sal ons gevoel van verpligting versterk. Dankbaarheid vermeerder namate ons daaraan uitdrukking gee, en die vreugde wat dit meebring, bevorder lewe vir siel en liggaam. –R. & H., 4 Feb. 1902.

Eers die Tiendes-Dan die Offergawes

Hierdie saak van gee word nie aan impulsiwiteit oorgelaat nie. God het ons duidelike opdragte in hierdie verband gegee. Hy het tiendes en offergawes as die mate van ons verantwoordelikheid genoem. Hy verlang dat ons gereeld en stelselmatig sal gee. ... Laat elkeen gereeld sy inkomste, wat alles as 'n seën van God kom, in oënskyn neem en sy tiende opsy sit as spesiale fonds, wat heilig aan die Here is. Hierdie bedrag behoort onder geen omstandighede vir enige ander doel aangewend te word nie; dit moet uitsluitlik vir die onderhoud van die evangeliebediening gebruik word. Nadat die tiendes opsy gesit is, laat skenkings en offergawes bereken word, "namate sy voorspoed is." –R. & H., 9 Mei 1893.

Kom Gods Vereistes Eerste Na

Nie alleen eis God die tiende as Syne nie, maar Hy vertel ons ook hoe dit

vir Hom afgesonder moet word. Hy sê:

"Vereer die Here uit jou goed en uit die eersteling van al jou inkomste." Dit leer ons nie dat ons inkomste op onself spandeer moet word en ons dan aan God die oorblywende deel moet bring nie, al sou dit nog andersins 'n eerlike tiende wees. Gods deel moet eerste opsy gesit word. –R. & H., 4 Feb. 1902.

Ons moenie wat van ons inkomste oorbly, nadat al ons werklike of denkbeeldige behoeftes bevredig is, aan Hom toewy nie. Voordat enigiets gebruik word, moet ons die deel opsy sit wat Hy as Sy eie gespesifiseer het.

Baie mense sal al hulle minder belangrike vereistes nakom en rekeningens vereffen, en net die laaste skraapsels, indien enige, vir God laat. Indien daar niks oor is nie, moet Sy saak maar vir 'n meer geleë tyd wag. –R. & H., 16 Mei 1882.

DIE SONDE VAN ANANIAS

Die harte van Ananias en sy vrou is deur die Heilige Gees ontroer om hul besittings aan God toe te wy, soos hulle broeders gemaak het. Maar nadat hulle die gelofte afgelê het, het hulle daarvan teruggedeins, en hulle voorgeneem om dit nie na te kom nie. Terwyl hulle verklaar het dat hulle alles gee, het hulle 'n gedeelte van die prys agtergehou. Hulle het teenoor God bedrog gepleeg en vir die Heilige Gees gelieg, en hulle misdaad is met 'n vinnige en vreeslike oordeel besoek. Hulle het nie net die teenwoordige nie, maar ook die ewige lewe kwytgeraak.

Die Here het gesien dat hierdie treffende openbaring van Sy oordeel nodig was om te verhoed dat andere hulle dieselfde skuld op die hals haal. Dit het getuig dat die mens God nie kan bedrieg nie, dat Hy die verborge sonde van die hart raak sien en Hom nie laat bespot nie. Dit is as 'n waarskuwing aan die jong kerk bedoel, om hulle daartoe te lei om hul motiewe te ondersoek om versigtig te wees om nie aan selfsug en verwaandheid toe te gee nie, om daarvoor bedug te wees om God te beroof.

In die geval van Ananias is die sonde van bedrog teen God spoedig opgespoor en gestraf. Hierdie voorbeeld van Gods oordeel is as gevaar-teken vir toekomstige geslagte bedoel. Dieselfde sonde is in die daaropvolgende geskiedenis van die Kerk dikwels herhaal, en dit word in ons tyd deur baie gepleeg; maar hoewel dit nie met die sigbare openbaring van Gods ontevredenheid gepaard gaan nie, is dit deesdae geensins minder

afskuwelik in Sy oë as wat dit in die tyd van die apostels was nie. Die waar-skuwing is daargestel, God het duidelik Sy afsku van hierdie sonde bekend gemaak, en almal wat 'n dergelike rigting inslaan, kan daarvan seker wees dat hulle besig is om hul eie siele te vernietig...

Dit is net wanneer Christelike motiewe ten volle erken word, en die gewete wakker is vir sy plig, wanneer Goddelike lig die hart en karakter beïndruk, dat selfsug oorwin en die gesindheid van Christus verwesenlik word. Die Heilige Gees wat op menseharte en -karakters inwerk, sal die neigings tot gierigheid en 'n bedrieglike handelwyse verdryf.

By sekere geleenthede het die Here die harte van wêreldsgesinde, self-sugtige manne opvallend ontroer. Hul verstande is deur die Heilige Gees verlig, hul harte het Sy versagtende en oorwinnende invloed gevoel. Onder 'n besieling van die oorstroomende genade en barmhartigheid van God, het hulle dit as hul plig aangevoel om Sy saak te bevorder, om Sy koninkryk op te bou. ... Hulle het 'n verlange gevoel om 'n deel te hê aan die koninkryk van God, en het geloftes gedoen om van hul middele te gee aan sommige van die verskillende ondememings in die Here se saak. Daardie geloftes is nie teenoor die mens afgelê nie, maar aan God in die teenwoordigheid van Sy engele, wat die harte van hierdie selfsugtige, geldgierige manne ontroer het.

Toe hulle die gelofte gedoen het, is hulle ryklik geseën, maar hoe spoedig verander die gevoelens nie wanneer hulle weer op gewone grond staan nie. Namate die onmiddellike indrukke van die Heilige Gees verdof, namate wêreldse sake die verstand en hart weer in beslag neem, is dit vir hulle baie moeilik om die toewyding van hulself en hul geld aan die Here te handhaaf. Satan val hulle met sy versoeking aan: "Jy was dwaas om daardie geld te belê, jy het dit nodig om in jou sakeondememings te belê en jy sal verlies ly as jy die gelofte nakom."

Dan deins hulle terug, hulle murmureer, hulle kla oor die Here se boodskap en Sy boodskappers. Hulle raak onwaarhede kwy, en verklaar dat hulle die gelofte in 'n gees van opgewondenheid gedoen het, dat hulle die saak nie ten volle begryp het nie, dat die aangeleentheid oordryf is, hulle gevoelens gaande gemaak is, en dat dit hulle die gelofte laat doen het. Hulle het gepraat asof die kosbare seën wat hulle ontvang het, die gevolg was van bedrog wat deur die predikant teenoor hulle gepleeg is, om geld te verkry. Hulle verander van sienswyse, en voel onder geen verpligting om hul geloftes aan God af te los nie. Daar vind die vreeslikste berowing

van God plaas, en flou verskonings word aangevoer om die Heilige Gees te weerstaan en te verloën. Sommige praat van ongerief; hulle sê hulle het hul geld nodig -om wat mee te maak? Om in huise en grond te begrawe, in die een of ander geldmakery. Omdat die gelofte vir 'n godsdienstige doel afgelê is, meen hulle dat dit nie deur die gereg gehandhaaf kan word nie, en die liefde vir geld het hulle so vas in sy greep dat hulle hul eie siele mislei, en hulle waag dit om God te beroof. Aan baie kan daar gesê word: "U behandel geen ander vriend so sleg nie."

Die getal van diegene wat die sonde van Ananias en Saffira pleeg, is aan die toeneem. Mense lieg nie vir mense nie, maar vir God wanneer hulle die geloftes, wat Sy Gees hulle beweeg het om te doen, verontagsaam. Omdat die oordeel oor 'n verkeerde daad nie, soos in die geval van Ananias en Saffira, gou voltrek word nie, daarom is die hart van die mensekinders in hulle vol om kwaad te doen, om wederstrewig te wees teen die Gees van God. Hoe sal hierdie manne in die oordeel standhou? Durf u die uiteindelijke gevolg van hierdie saak verduur? Hoe sal u staan te midde van die tonele wat in die boek Openbaring beskryf word? "En ek het 'n groot wit troon gesien en Hom wat daarop sit, van wie se aangesig die aarde en die hemel weggevlug het; en daar is geen plek vir hulle gevind nie. En ek het die dode, klein en groot, voor God sien staan... en hulle is geoordeel, elkeen volgens sy werke." -R. & H., 23 Mei 1893.

